

晉

書

一



百衲本二十四史

晉書

四部叢刊史部

上海涵芬樓影印海
甯蔣氏衍芬艸堂藏
宋本原闕載記三十
卷以江蘇省立國學
圖書館藏宋本配補

晉書目錄

唐太宗文皇帝御撰

帝紀十卷

第一卷

高祖宣帝懿

第二卷

世宗景帝師

太祖文帝昭

第三卷

世祖武帝炎


第四卷

孝惠帝衷

第五卷

孝懷帝熾

孝愍帝鄴



第六卷

中宗元帝睿

肅宗明帝紹

第七卷

顯宗成帝衍

康帝岳

第八卷

孝宗穆帝聃

哀帝丕

廢帝海西公弈

第九卷

太宗簡文帝昱

孝武帝曜

第十卷

安帝德宗

恭帝德文

○志二十卷

第一卷

天文上

第二卷

天文中

第三卷

天文下

第四卷

地理上

第五卷

地理下

第六卷

律歷上

第七卷

律歷中

第八卷

律歷下

第九卷

禮上

第十卷

禮中

第十一卷

禮下

第十二卷

樂上

第十三卷

樂下

第十四卷

職官

第十五卷

輿服

第十六卷

食貨

第十七卷

五行上

第十八卷

五行中

第十九卷

五行下

第二十卷

刑法

。列傳七十卷

第一卷

后妃上

宣穆張皇后

景懷夏侯皇后

景獻羊皇后

文明王皇后

武元楊皇后

武悼楊皇后

左貴嬪 胡貴嬪
諸葛夫人

惠賈皇后

惠羊皇后

謝夫人

懷王太后

元夏侯太妃

第二卷

后妃下

元敬虞皇后

荀豫章君

明穆庾皇后

成恭杜皇后

章周太妃

康獻褚皇后

穆章何皇后

哀靖王皇后

廢帝庾皇后

簡文宣鄭太后

簡文順王皇后

孝武文李太后

孝武定王皇后

安德陳太后

安僖王皇后

恭思褚皇后

第三卷

王祥

弟覽

鄭冲

何曾

子劭遵

石苞

子崇孫鍊

歐陽

第四卷

羊祜

杜預

子錫

第五卷

陳騫子輿

裴秀子顯
秀從弟楷

第六卷

衛瓘子恒
孫璩玠

張華子禧
贈

第七卷

宗室

安平獻王孚子邕
邕弟義陽成王望
望弟河間平王洪
望弟太原成王輔
輔弟翼
翼弟下邳獻王晃
晃弟太原烈王瓌
瓌弟高陽元王珪
珪弟常山孝王衡
衡弟沛順王景

彭城穆王權孫紘
紘子俊
高密文獻王泰子孝王略
略兄
新蔡武安王騰

騰子莊王確
略弟南陽王模
范陽康王綏子瓚

濟南惠王遂曾孫勲
譙剛王遜子閔王承
承子烈王無忌
無忌子寄王恬
恬子忠

王尚之尚之弟恢之
恢之
韓延之恬弟愔
高陽王睦

任城景王陵弟順斌

第八卷

宣五王

文六王

平原王幹

琅邪王伾

清惠亭侯京

扶風王駿

梁王彤

齊王攸

城陽王兆

遼東王定國

廣漢王廣德

樂安王鑒

樂平王延祚

第九卷

王沉子俊

荀顗

荀勗

子藩 藩子遂 閭藩弟組 組子弈

馮紆

第十卷

賈充

孫謚 充弟混族子模 郭彰

楊駿

弟珪 濟

第十一卷

魏舒

李憺

劉寔弟智

高光

第十二卷

王渾子濟

王濬

唐彬

第十三卷

山濤子簡簡子遐

王戎從弟衍衍弟澄郭舒

樂廣

第十四卷

鄭袤默子默珠

李胤

盧欽珽子浮弟珽志子謏

華表子虞虞子恒虞弟嶠

石鑒

溫羨

第十五卷

劉毅

子職
程衛

和嶠

武陔

任愷

崔洪

郭弈

侯史光

何攀

第十六卷

劉頌

李重

第十七卷

傅玄子咸從父弟祗

第十八卷

向雄

段灼

閻續

第十九卷

阮籍

兄子咸從子脩

咸子瞻瞻弟孚族弟放放弟裕

嵇康

向秀

劉伶

謝鯤

胡母輔之

之子謙

畢卓

王尼

羊曼

弟聃

光逸

第二十卷

曹志

庾峻

子氓氓弟散

郭象

庾純

子粲

秦秀

第二十一卷

皇甫謐

子方回

摯虞

束皙

王接

第二十二卷

郤詵

阮种

華譚

袁甫

第二十三卷

愍懷太子適子彰臧尚

第二十四卷

陸機孫拯

弟雲雲弟耽從父兄喜

第二十五卷

夏侯湛弟淳子承

潘岳從子尼

張載弟協協弟元

第二十六卷

江統子廓

孫楚子衆自纂纂子統

第二十七卷

羅憲兄子尚

滕脩
馬隆

胡奮

陶璜
吾彥

張光

趙誘

第二十八卷

周處

子玘 玘弟綰 玘弟札 札兄子建

周訪

子撫 撫子楚 楚子瓊 瓊子愬 撫弟光 光子仲孫

第二十九卷

汝南文成王亮

子粹 粹弟義 宗 熙

楚隱王瑋

趙王倫

齊王冏

方 鄭

長沙厲王乂

成都王穎

河間王顥

東海孝獻王越

第三十卷

解系

弟結 結弟育

孫旂

孟觀

牽秀

繆播

從弟胤

皇甫重

張輔

李含

張方

閻鼎

索靖

子綝

賈疋

第三十一卷

周浚

子嵩謨從父弟馥

成公簡

荀晞

華軼

劉喬

孫耽耽子柳

第三十二卷

劉琨

琨子羣琨兄興

祖逖

兄納

第三十三卷

邵續

李矩

段匹磾

魏浚

浚族子該

郭默

第三十四卷

武十五王

元四王

簡文三王

第三十五卷

王導

子悅恬洽協劭奮洽子珣珉劭子謚

第三十六卷

劉弘

陶侃兄子臻臻弟興

第三十七卷

溫嶠

郝鑒

子愔愔子超愔弟曇鑒叔父隆

第三十八卷

顧榮

紀瞻

賀循方楊

薛兼

第三十九卷

劉隗

孫波

刁協

子彞子達

戴若思弟邈

周顗

子閔

第四十卷

應詹

甘卓

鄧寒

卞壺

從父兄敦

劉超

鍾雅

第四十一卷

孫惠

熊遠

王鑒

陳頤

高崧

第四十二卷

郭璞

葛洪

第四十三卷

庾亮

子彬義
弟懌冰條

翼

第四十四卷

桓彝

子雲雲弟豁豁子石虔虔子振虔弟石秀石民石生石綏
石康豁弟秘秘弟冲冲子嗣嗣子肖嗣弟謙謙弟脩徐寧

第四十五卷

王湛

子承承子述述子坦之
國寶枕愉子綏承族子嶠表悅之祖台之荀崧子蕤羨

范汪

子甯汪叔堅

劉惔

張憑

韓伯

第四十六卷

王舒

子充之

王廙

弟彬彬子彪之

王稜

虞潭

孫嘯父兄子驥

顧衆

張闓

第四十七卷

陸曄

曄弟琬琬子紉

何充

褚裒

蔡謨

諸葛恢

殷浩

顧悅之

蔡裔

第四十八卷

孔愉

子汪安國弟祗從子坦嚴從弟羣羣子況

丁潭

張茂

陶回

第四十九卷

謝尚

謝安安子琰琰子混安兄弈弈子玄安第万万第石石兄子朗朗第子邈

第五十卷

王羲之

子玄之疑之徽之徽之手植之徽之弟操之獻之

許邁

第五十一卷

王遜

蔡豹

羊鑒

劉胤

栢宜族子伊

朱伺

毛寶

子穆之安之孫據宗人德祖

劉遐

鄧嶽子遐

朱序

第五十二卷

陳壽

王長文

虞溥

司馬彪

王隱

虞預

孫盛

干寶

鄧粲

謝沉

習鑿齒

徐廣

第五十三卷

顧和

袁瓌

子喬 喬孫崧 瓌弟猷 從祖準 準孫耽 耽子質 質子湛 豹

江道

從弟灌 灌子績

車胄

殷覬

王雅

第五十四卷

王恭

庾楷

劉牢之 子敬宣

殷仲堪

楊佺期

第五十五卷

劉毅 兄邁

諸葛長民

何無忌

檀憑之

魏詠

第五十六卷

第五十七卷

張軌

軌子寔寔弟茂寔子駿駿子重華華子耀靈靈伯父祚靈弟玄靚靚叔天錫

涼武昭王李玄盛

子士業

第五十八卷

孝友

李密

盛彥

夏方

王裒

許孜

庾袞

孫畧

顏含

劉玘

王延

王談

桑虞

何琦

吳達

第五十九卷

忠義

嵇紹

從子含

王豹

劉沉

麴允

焦嵩

賈渾

王育

韋忠

辛勉

劉敏元

周該

栢雄

韓階

周崎

易雄

樂道融

虞悺

沈勁

吉挹

王諒

宋矩

車濟

丁穆

辛恭靖

羅企生

張緯

第六十卷

良吏

魯芝

胡威

杜軫

竇允

王宏

曹攄

潘京

范晷

丁紹

喬智明

鄧攸

吳隱之

第六十一卷

儒林

范平

文立

陳邵

虞喜

劉兆

紀毓

徐苗

崔遊

范隆

杜夷

董景道

續咸

徐邈

孔衍

范宣

韋謏

范弘之

王歡

第六十二卷

文苑

應貞

成公綏

左思

趙至

鄒湛

棗據

褚陶

王沉

張翰

庾闡

曹毗

李充

袁宏

伏滔

羅含

顧愷之

郭澄之

第六十三卷

外戚

羊琇

王恂

弟虔

楊文宗

羊玄之

虞豫

子脊

庾琛

杜乂

褚裒

何準

子澄

王濛

子脩

王遐

王蘊

褚爽

第六十四卷

隱逸

孫登

董京

夏統

朱沖

范粲

子喬

魯勝

董養

霍原

郭琦

伍朝

魯褒

化騰

任旭

郭文

龔壯

孟陋

韓績

譙秀

翟湯

子莊

郭翻

辛謚

劉麟之

索襲

楊軻

公孫鳳

公孫永

張忠

石坦

宋纖

郭荷

郭瑀

郝嘉

瞿硯先生

謝敷

戴逵

龔玄之

陶淡

陶潛

第六十五卷

藝術

陳訓

戴洋

韓友

淳于智

步熊

杜不愆

嚴卿

隗炤

卜珥

鮑靚

吳猛

辛靈

佛圖澄

麻襦

單道開

黃泓

索統

孟欽

王嘉

僧涉

郭磨

鳩摩羅什

曇霍

臺產

第六十六卷

烈女

姜耽妻辛氏

杜有道妻嚴氏

王渾妻鍾氏

鄭袤妻曹氏

愍懷太子妃王氏

郭休妻石氏

陶侃母湛氏

賈渾妻宗氏

梁緯妻辛氏

許延妻杜氏

虞潭母孫氏

周顗母李氏

張茂妻陸氏

尹虞二女

荀崧小女灌

王凝之妻謝氏

劉臻妻陳氏

皮京妻龍氏

孟昶妻周氏

何無忌母劉氏

劉聰妻劉氏

王廣女

陝婦人

靳康女

韋逞母宋氏

張天錫二妾蘭氏

苻堅妾張氏

竇滔妻蘇氏

苻登妻毛氏

慕容垂妻段氏

段豐妻慕容氏

呂纂妻楊氏

呂紹妻張氏

涼武昭王李玄盛后尹氏

第六十七卷

四夷

東夷

夫餘倭人

馬韓辰韓

肅慎

等十國

西戎

吐谷渾大宛

焉耆

龜茲康居大秦

南蠻

林邑扶南

北狄

匈奴

第六十八卷

王敦

沈充

栢温

孟嘉

第六十九卷

栢玄

卞範之

殷仲文

第七十卷

王弥

張昌

陳敏

王如

杜曾

杜弢

王機

祖約

蘇峻

孫恩

盧循

譙縱

載記三十卷

第一卷

劉元海子和劉宣

第二卷

劉聰子粲陳元達

第三卷

劉曜

第四卷

石勒上

第五卷

石勒下子弘張賓

第六卷

石季龍上

第七卷

石季龍下

子世遵鑒
冉閔

第八卷

慕容廆

裴嶷
高瞻

第九卷

慕容皝

慕容翰
陽裕

第十卷

慕容雋

韓恒
李產
產子績

第十一卷

慕容暉

慕容恪
陽騫
皇甫真

第十二卷

苻洪

苻健

苻生

苻雄
王墜

第十三卷

符堅上

第十四卷

符堅下

王猛 符融 符朗

第十五卷

苻丕

苻登 索泮 徐嵩

第十六卷

姚弋仲

姚襄

姚萇

第十七卷

姚興上

第十八卷

姚興下

尹緯

第十九卷

姚泓

第二十卷

李特

李流 李庠

第二十一卷

李雄

李班

李期

李壽

李勢

第二十二卷

呂光

呂纂

呂隆

第二十三卷

慕容垂

第二十四卷

慕容寶

慕容盛

慕容熙

慕容雲

第二十五卷

乞伏國仁 乞伏軋歸 乞伏熾磐 馮跋 馮素弗

第二十六卷

禿髮烏孤 禿髮利鹿孤 禿髮傉檀

第二十七卷

慕容德

第二十八卷

慕容超 慕容鍾 封孚

第二十九卷

沮渠蒙遜

第三十卷

赫連勃勃

右晉十二世十五帝一百五十六年

中朝四帝都洛陽五十四年

江左十一帝都建康一百二年

有五涼四燕三秦二趙夏蜀十

六國附其書起乙酉盡庚申

晉書總目終



帝紀卷第一

晉書一

御撰

宣帝

宣皇帝諱懿字仲達河內溫縣孝苛里人姓司馬氏其先出自帝高陽之子重黎爲夏官祝融歷唐虞夏商世序其職及周以夏官爲司馬其後程伯休父周宣王時以世官克平徐方錫以官族因而爲氏楚漢間司馬卬爲趙將與諸侯伐秦秦亡立爲躬王都河內漢以其地爲郡子孫遂家焉自卬八世生征西將軍鈞字叔平鈞生豫章太守量字公度量生潁川太守雋字元異雋生京兆尹防字建公帝即防之第二子也少有奇節聰朗多大略博學洽聞伏膺儒教漢末大亂常慨然有憂天下心南郡太守同郡楊俊名知人見帝未弱冠以爲非常之器尚書清河崔琰與帝兄朗善亦謂朗曰君弟聰亮明允剛斷英特非子所及也漢建安六年郡舉上計掾魏武帝爲司空聞而辟之帝知漢運方微不欲屈節曹氏辭以風痺不能起居魏武使人夜往密刺之帝堅卧不動及魏武爲丞相又辟爲文學掾勅行者曰

若復盤桓便收之帝懼而就職於是使與太子游處遷黃門侍郎轉議郎丞相東曹屬尋轉主簿從討張魯言於魏武曰劉備以詐力虜劉璋蜀人未附而遠爭江陵此機不可失也今若曜威漢中益州震動進兵臨之勢必瓦解因此之勢易爲功力聖人不能違時亦不失時矣魏武曰人若無足旣得隴右復欲得蜀言竟不從旣而從討孫權破之軍還權遣使乞降上表稱臣陳說天命魏武帝曰此兒欲踞吾著爐炭上邪荅曰漢運垂終殿下十分天下而有其九以服事之權之稱臣天人之意也虞夏躬周不以謙讓者畏天知命也

魏國旣建遷太子中庶子每與大謀輒有奇策爲太子所信重與陳羣吳質朱鑠號曰四友遷爲軍司馬言於魏武曰昔箕子陳謀以食爲首今天下不耕者蓋二十餘萬非經國遠籌也雖戎甲未卷自宜且耕且守魏武納之於是務農積穀國用豐贍帝又言荊州刺史胡脩麤暴南鄉太守傅方驕奢並不可居邊魏武不之察及蜀將關羽圍曹仁於樊于禁等七軍皆沒脩方果降羽而仁圍甚急焉是時漢

帝都許昌魏武以爲近賊欲徙河北帝諫曰禁等爲水所沒非戰守之所失於國家大計未有所損而便遷都旣示敵以弱又淮沔之人大不安矣孫權劉備外親內疎羽之得意權所不願也可喻權所令掎其後則樊圍自解魏武從之權果遣將呂蒙西襲公安拔之羽遂爲蒙所獲魏武以荊州遺黎及屯田在潁川者逼近南寇皆欲徙之帝曰荆楚輕脫易動難安關羽新破諸爲惡者藏竄觀望今徙其善者旣傷其意將令去者不敢復還從之其後諸亡者悉復業及魏武薨于洛陽朝野危懼帝綱紀喪事內外肅然乃奉梓宮還鄴

魏文帝即位封河津停侯轉丞相長史會孫權帥兵西過朝議以樊襄陽無穀不可以禦寇時曹仁鎮襄陽請召仁還宛帝曰孫權新破關羽此其所自結之時也必不敢爲患襄陽水陸之衝禦寇要害不可棄也言竟不從仁遂焚棄二城權果不爲寇魏文悔之及魏受漢禪以帝爲尚書頃之轉督軍御史中丞封安國鄉侯

黃初二年督軍官罷遷侍中尚書右僕射

五年天子南巡觀兵吳疆帝留鎮許昌改封向鄉侯轉撫軍假節領兵五千加給事中錄尚書事帝固辭天子曰吾於庶事以夜繼晝無須更寧息此非以爲榮乃分憂耳

六年天子復大興舟師征吳復命帝居守內鎮百姓外供軍資臨行詔曰吾深以後事爲念故以委卿曹叅雖有戰功而蕭何爲重使吾無西顧之憂不亦可乎天子自廣陵還洛陽詔帝曰吾東撫軍當總西事吾西撫軍當總東事於是帝留鎮許昌及天子疾篤帝與曹真陳群等見於崇華殿之南堂並受顧命輔政詔太子曰有間此三公者慎勿疑之明帝即位改封舞陽侯及孫權圍江夏遣其將諸葛瑾張霸并攻襄陽帝督諸軍討權走之進擊敗瑾斬霸并首級千餘遷驃騎將軍

太和元年六月天子詔帝屯于宛加督荆豫二州諸軍事初蜀將孟達之降也魏朝遇之甚厚帝以達言行傾巧不可任驟諫不見聽乃以達領新城太守封侯假節達於是連吳固蜀潛圖中國蜀相諸葛

亮惡其反覆又慮其爲患達與魏興太守申儀有隙亮欲促其事乃遣郭模詐降過儀因漏泄其謀達聞其謀漏泄將舉兵帝恐達速發以書喻之曰將軍昔棄劉備託身國家國家委將軍以疆場之任任將軍以圖蜀之事可謂心貫白日蜀人愚智莫不切齒於將軍諸葛亮欲相破惟苦無路耳模之所言非小事也亮豈輕之而令宣露此殆易知耳達得書大喜猶與不決帝乃潛軍進討諸將言達於二賊交構宜觀望而後動帝曰達無信義此其相疑之時也當及其未定促決之乃倍道兼行八日到其城下吳蜀各遣其將向西城安橋木闌塞以救達帝分諸將以距之初達與亮書曰死去洛八百里去吾一千二百里聞吾舉事當表上天子比相反覆一月間也則吾城已固諸軍足辦則吾所在深險司馬公必不自來諸將來吾無患矣及兵到達又告亮曰吾舉事八日而兵至城下何其神速也上庸城三面阻水達於城外爲木柵以自固帝渡水破其柵直造城下入道攻之旬有六日達甥鄧賢將李輔等開門出降斬達首傳京師俘獲萬

餘人振旅還于宛乃勸農桑禁浮費南土悅附焉初申儀久在魏興
專威疆場輒承制刻印多所假授達既誅有自疑心時諸郡守以帝
新克捷奉禮求賀皆聽之帝使人諷儀儀至問承制狀執之歸于京
師又徙孟達餘衆七千餘家于幽州蜀將姚靜鄭他等帥其屬七千
餘人來降時邊郡新附多無戶名魏朝欲加隱實屬蜀帝朝于京師天
子訪之於帝帝對曰賊以密網束下故下棄之宜弘以大綱則自然
安樂又問二虜宜討何者爲先對曰吳以中國不習水戰故敢散居
東關凡攻敵二扼其喉而搯其心夏口東關賊之心喉若爲陸軍以
向皖城引權東下爲水戰軍向夏口乘其虛而擊之此神兵從天而
墮破之必矣天子並然之復命帝屯于宛

四年遷大將軍加大都督假黃鉞與曹真伐蜀帝自西城斫山開道
水陸並進汧河而上至于朐_{上音蠡下}如允反拔其新豐縣軍次丹口遇
雨班師明年諸葛亮寇天水圍將軍賈嗣魏平於祁山天子曰西方
有事非君莫可付者乃使帝西屯長安都督雍梁二州諸軍事統車

騎將軍張郃後將軍費曜征蜀護軍戴凌雍州刺史郭淮等討亮張
郃勸帝分軍住雍郃爲後鎮帝曰料前軍獨能當之者將軍言是也
若不能當而分爲前後此楚之三軍所以爲黥布擒也遂進軍隄麋
亮聞大軍且至乃自帥衆將芟上邽之麥諸將皆懼帝曰亮慮多決
少必安營自固然後芟麥吾得二日兼行足矣於是卷甲晨夜赴之
亮望塵而遁帝曰吾倍道疲勞此曉兵者之所貪也亮不敢據渭水
此易與耳進次漢陽與亮相遇帝列陣以待之使將牛金輕騎餌之
兵才接而亮退追至祁山亮屯鹵城據南北二山斷水爲重圍帝攻
拔其圍亮宵遁追擊破之俘斬萬計天子使使者勞軍增封邑時軍
師杜襲督軍薛悌皆言明年麥熟亮必爲寇隴右無穀宜及冬豫運
帝曰亮再出祁山一攻陳倉挫衄而反縱其後出不復攻城當求野
戰必在隴東不在西也亮每以糧少爲恨歸必積穀以吾料之非三
稔不能動矣於是表徙翼州農夫佃上邽興京兆天水南安監治
青龍元年穿成國渠築臨晉陂溉田數千頃國以充實焉

二年亮又帥衆十餘萬出斜谷壘于郿之渭水南原天子宴之遣征蜀護軍秦朗督步騎二萬受帝節度諸將欲往渭北以待之帝曰百姓積聚皆在渭南此必爭之地也遂引軍而濟背水爲壘因謂諸將曰亮若勇者當出武功依山而東若西上五丈原則諸軍無事矣亮果上原將北渡渭帝遣將軍周當屯陽遂以餌之數日亮不動帝曰亮欲爭原而不向陽遂此意可知也遣將軍胡遵雍州刺史郭淮共備陽遂與亮會于積石臨原而戰亮不得進還于五丈原會有長星墜亮之壘帝知其必敗遣奇兵擣亮之後斬五百餘級獲生口千餘降者六百餘人時朝廷以亮僞軍遠寇利在急戰每命帝持重以候其變亮數挑戰帝不出因遺帝巾幘婦人之飾帝怒表請決戰天子不許乃遣骨鯁臣衛尉辛毗杖節爲軍師以制之後亮復來挑戰帝將出兵以應之毗杖節而立軍門帝乃止初蜀將姜維聞毗來謂亮曰辛毗杖節而至賊不復出矣亮曰彼本無戰心所以固請者以示武於其衆耳將在軍君命有所不受苟能制吾豈千里而請戰邪帝

弟孚書問軍事帝復書曰亮志大而不見機多謀而少決好兵而無權雖提卒十萬已隨吾畫中破之必矣與之對壘百餘日會亮病卒諸將燒營遁走百姓奔告帝出兵追之亮長史楊儀反旗鳴鼓若將距帝者帝以窮寇不之逼於是楊儀結陣而去經日乃行其營壘觀其遺事獲其圖書糧穀其衆帝審其必死曰天下奇才也辛毗以爲尚未可知帝曰軍家所重軍書密計兵馬糧穀今皆棄之豈有人捐其五藏而可以生乎宜急追之關中多蒺藜帝使軍士二千人著軟材平底木屐前行蒺藜悉著屐然後馬步俱進追到赤岸乃知亮死審問時百姓爲之諺曰死諸葛走生仲達帝聞而笑曰吾便料生不便料死故也先是亮使至帝問曰諸葛公起居何如食可幾米對曰三四升次問政事曰二十罰已上皆自省覽帝旣而告人曰諸葛孔明其能久乎竟如其言亮部將楊儀魏延爭權儀斬延并其衆帝欲乘隙而進有詔不許

三年遷太尉累增封邑蜀將馬岱入寇帝遣將軍牛金擊走斬千餘

級武都氏王符雙強端帥其屬六千餘人來降關東饑帝運長安粟五百萬斛輸于京師

四年獲白鹿獻之天子曰昔周公旦輔成王有素雉之貢今君受陝西之任有白鹿之獻豈非忠誠協符千載同契俾乂邦家以永厥休邪及遼東太守公孫文懿反徵帝詣京師天子曰此不足以勞君事欲必克故以相煩耳君度其作何計對曰棄城預走上計也據遼水以距大軍次計也坐守襄平此成擒耳天子曰其計將安出對曰惟明者能深度彼已預有所棄此非其所及也今懸軍遠征將謂不能持久必先距遼水而後守此中下計也天子曰往還幾時對曰往百日還百日攻百日以六十日爲休息一年足矣是時大修宮室加以軍旅百姓饑弊帝將即戎乃諫曰昔周公營洛邑蕭何造未央宮室未備臣之責也然自河以北百姓困窮外有役勢不並與宜假絕內務以救時急

景初二年帥牛金胡遵等步騎四萬發自京都車駕送出西明門詔

弟孚子師送過溫賜以穀帛牛酒勅郡守典農已下皆往會焉見父
老故舊讌飲累日帝歎息悵然有感爲歌曰天地開闢日月重光遭
遇際會畢力遐方將埽群穢還過故鄉肅清萬里總齊八荒告成歸
老待罪舞陽遂進師經孤竹越碣石次于遼水文懿果遣步騎數萬
阻遼隧堅壁而守南北六七十里以距帝帝盛兵多張旗幟出其南
賊盡銳赴之乃泛舟潛濟以出其北與賊營相逼沉舟焚梁傍遼水
作長圍棄賊而向襄平諸將言曰不攻賊而作圍非所以示衆也帝
曰賊堅營高壘欲以老吾兵也攻之正入其計此王邑所以取過昆
陽也古人曰敵雖高壘不得不與我戰者攻其所必救也賊大衆在
此則巢窟虛矣我直指襄平必入懷內懼懼而求戰破之必矣遂整
陣而過賊見兵出其後果邀之帝謂諸將曰所以不攻其營正欲致
此不可失也乃縱兵逆擊大破之三戰皆捷賊保襄平進軍圍之初
文懿聞魏師之出也請救於孫權權亦出兵遙爲之聲援遺文懿書
曰司馬公善用兵變化若神所向無前深爲弟憂之會霖潦大水平

地數尺三軍恐欲移營帝令軍中敢有言徙者斬都督令史張靜犯
令斬之中軍乃定賊恃水樵牧自若諸將欲取之皆不聽司馬陳珪曰
昔攻上庸八部並進晝夜不息故能旬之半拔堅城斬孟達今者
遠來而更安緩愚竊惑焉帝曰孟達衆少而食支一年將士四倍於
達而糧不淹月以一月圖一年安可不速以四擊一正令半解猶當
爲之是以不計死傷與糧競也今賊衆我寡賊飢我飽水雨乃爾功
力不設雖當促之亦何所爲自發京師不憂賊攻但恐賊走今賊糧
垂盡而圍落未合掠其牛馬抄其樵采此故驅之走也夫兵者詭道
善因事變賊憑衆恃雨故雖飢困未肯束手當示無能以安之取小
利以驚之非計也朝廷聞師遇雨咸請召還天子曰司馬公臨危制
變計曰擒之矣旣而雨止遂合圍起土山地道楯櫓鉤撞發矢石雨
下晝夜攻之時有長星色白有芒鬚自襄平城西南流于東北墜于
梁水城中震懼文懿大懼乃使其所署相國王建御史大夫柳甫乞
降請解圍面縛不許執建等皆斬之檄告文懿曰昔楚鄭列國而鄭

伯猶肉袒牽羊而迎之孤為主人位則上公而建等欲孤解圍退舍
豈楚鄭之謂邪二人老耄必傳言失旨已相為斬之若意有未已可
更遣年少有明決者來文懿復遣侍中衛演乞剋日送任帝謂演曰
軍事大要有五能戰當戰不能戰當守不能守當走餘三事惟有降
與死耳汝不肯面縛此為決就死也不須送任文懿攻南圍突出帝
縱兵擊敗之斬于梁水之上星墜之所既入城立兩標以別新舊焉
男子年十五已上七千餘人皆殺之以為京觀偽公卿已下皆伏誅
戮其將軍畢盛等二千餘人收尸四萬口三十餘萬初文懿篡其叔
父恭位而囚之及將反將軍綸直賈範等苦諫文懿皆殺之帝乃釋
恭之囚封直等之墓顯其遺嗣令曰古之伐國誅其鯨鯢而已諸為
文懿所誣誤者皆原之中國人欲還舊鄉悉聽之時有兵士寒凍乞
襦帝弗之與或曰幸多故襦可以賜之帝曰襦者官物人臣無私施
也乃奏軍人年六十已上者罷遣千餘人將吏從軍死亡者致喪還
家遂班師天子遣使者勞軍于薊增封食昆陽并前二縣初帝至襄

平夢天子枕其膝曰視吾面俛視有異於常心惡之先是詔帝便道鎮關中及次白屋有詔召帝三日之間詔書五至手詔曰間側息望到到便直排閣入視吾面帝大遽乃乘追鋒車晝夜兼行自白屋四百餘里一宿而至引入嘉福殿臥內升御牀帝流涕問疾天子執帝手目齊王曰以後事相託死乃復可忍吾忍死待君得相見無所復恨矣命與大將軍曹爽並受遺詔輔少主及齊王即帝位遷侍中持節都督中外諸軍錄尚書事與爽各統兵三千人共執朝政更直殿中乘輿入殿爽欲使尚書奏事先由己乃言於天子徙帝為大司馬朝議以為前後大司馬累薨於位乃以帝為太傅入殿不趨贊拜不名劔履上殿如漢蕭何故事嫁娶喪葬取給於官以世子師為散騎常侍子弟三人為列侯四人為騎都尉帝固讓子弟官不受

魏正始元年春正月東倭重譯納貢焉者危須諸國弱水以南鮮卑名王皆遣使來獻天子歸美宰輔又增帝封邑初魏明帝好脩宮室制度靡麗百姓苦之帝自遼東還役者猶萬餘人雕玩之物動以千計

至是皆奏罷之節用務農天下欣賴焉

二年夏五月吳將全琮寇芍陂朱然孫倫圍樊城諸葛瑾步騭掠相中帝請自討之議者咸言賊遠來圍樊不可卒拔挫於堅城之下有自破之勢宜長策以御之帝曰邊城受敵而安坐廟堂疆場騷動衆心疑惑是社稷之大憂也六月乃督諸軍南征車駕送出津陽門帝以南方暑濕不宜持久使輕騎挑之然不敢動於是休戰士簡精銳募先登申號令示必攻之勢吳軍夜遁走追至三州口斬獲萬餘人收其舟舩軍資而還天子遣侍中常侍勞軍于宛秋七月增封食鄢臨潁并前四縣邑萬戶子弟十一人皆爲列侯帝勲德日盛而謙恭愈甚以太常常林鄉邑舊齒見之每拜恒戒子弟曰盛滿者道家之所忌四時猶有推移吾何德以堪之損之又損之庶可以免乎

三年春天子追封謚皇考京兆尹爲舞陽成侯三月奏穿廣漕渠引河入汴溉東南諸陂始大佃於淮北先是吳遣將諸葛恪屯皖邊鄙苦之帝欲自擊恪議者多以賊據堅城積穀欲引致官兵今縣軍遠

攻其救必至進退不易未見其便帝曰賊之所長者水也今攻城以觀其變若用其所長棄城奔走此爲廟勝也若敢固守湖水冬淺船不得行勢必棄水相救由其所短亦吾利也

四年秋九月帝督諸軍擊諸葛恪車駕迭出津陽門軍次于舒恪焚燒積聚棄城而遁帝以滅賊之要在於積穀乃大興屯守廣開淮陽百尺二渠又脩諸陂於潁之南北萬餘頃自是淮北倉庾相望壽陽至于京師農官屯兵連屬焉

五年春正月帝至自淮南天子使持節勞軍尚書鄧颺李勝等欲令曹爽建立功名勸使伐蜀帝止之不可爽果無功而還

六年秋八月曹爽毀中壘中堅營以兵屬其弟中領軍羲帝以先帝舊制禁之不可冬十二月天子詔帝朝會乘輿升殿

七年春正月吳寇祖中夷夏萬餘家避寇北渡沔帝以沔南近賊若百姓奔還必復致寇宜權留之曹爽曰今不能脩守沔南而留百姓非長策也帝曰不然凡物致之安地則安危地則危故兵書曰成敗

形也安危勢也形勢御衆之要不可以不審設令賊以二萬人斷沔水三萬人與沔南諸軍相持萬人陸梁相中將何以救之爽不從卒令還南賊果襲破相中所失萬計

八年夏四月夫人張氏薨曹爽用何晏鄧颺丁謐之謀遷太后於永寧宮專擅朝政兄弟並典禁兵多樹親黨屢改制度帝不能禁於是與爽有隙五月帝稱疾不與政事時人爲之謠曰何鄧丁亂京城

九年春三月黃門張當私出掖庭才人石英等十人與曹爽爲伎人爽晏謂帝疾篤遂有無君之心與當密謀圖危社稷期有日矣帝亦潛爲之備爽之徒屬亦頗疑帝會河南尹李勝將莅荊州來候帝帝詐疾薦使兩婢侍持衣衣落指口言渴婢進粥帝不持杯飲粥皆流出霑臂勝曰衆情謂明公舊風發動何意尊體乃爾帝使聲氣纔屬說年老枕疾死在旦夕君當屈并州并州近胡善爲之備恐不復相見以子師昭兄弟爲託勝曰當還忝本州非并州帝乃錯亂其辭曰君方到并州勝復曰當忝荊州帝曰年老意荒不解君言今還

爲本州盛德壯烈好建功勳勝退告爽曰司馬公尸居餘氣形神已離不足慮矣他日又言曰大傳不可復濟令人愴然故爽等不復設備嘉平元年春正月甲午天子謁高平陵爽兄弟皆從是日太白襲月帝於是奏求寧太后廢爽兄弟時景帝爲中護軍將兵屯司馬門帝列陣闕下經爽門爽帳下督嚴世上樓引弩將射帝孫謙止之曰事未可知三注三止皆引其肘不得發大司農桓範出赴爽蔣濟言於帝曰智囊往矣帝曰爽與範內疎而智不及驚馬戀俎且必不能用也於是假司徒高柔節行大將軍事領爽營謂柔曰君爲周勃矣命太僕王觀行中領軍攝義營帝親帥太尉蔣濟等勤兵出迎天子屯于洛水浮橋上奏曰先帝詔陛下秦王及臣升于御牀握臣臂曰深以後事爲念今大將軍爽背棄顧命敗亂國典內則僭擬外專威權群官要職皆置所親宿衛舊人并見斥黜根據槃牙縱恣日甚又以黃門張當爲都監專共交關伺候神器天下凶人懷危懼陛下便爲寄坐豈得久安此非先帝詔陛下及臣升御牀之本意也臣雖朽

邁敢忘前言昔趙高極意秦是以亡呂霍早斷漢祚永延此乃陛下之殷鑒臣受命之秋也公卿群臣皆以爽有無君之心兄弟不宜典兵宿衛秦皇太后皇太后勅如奏施行臣輒勅主者及黃門令罷爽義訓吏兵各以本官候就第若稽留車駕以軍法從事臣輒力疾將兵詣洛水浮橋伺察非常爽不通奏留車駕宿伊水南伐樹為鹿角發屯兵數千人以守桓範果勸爽奉天子幸許昌移檄徵天下兵爽不能用而夜遣侍中許允尚書陳泰詣帝觀望風言帝數其過失事止免官泰還以報爽勸之通奏帝又遣爽所信殿中校尉尹大目諭爽指洛水為誓爽意信之桓範等援引古今諫說萬端終不能從乃曰司馬公正當欲奪吾權耳吾得以侯還第不失為富家翁範拊膺曰坐卿滅吾族矣遂通帝奏既而有司劾黃門張當并發爽與何晏等反事乃收爽兄弟及其黨與何晏丁謐鄧騭畢軌李勝桓範等誅之蔣濟曰曹真之勲不可以不祀帝不聽初爽司馬魯芝主簿楊綜斬關奔爽及爽之將歸罪也芝綜泣諫曰公居伊周之任挾天子杖天

威孰敢不從舍此而欲就東市豈不痛哉有司奏收芝綜科罪帝赦之曰以勸事君者二月天子以帝為丞相增封潁川之繁昌鄢陵新汲父城并前八縣邑二萬戶奏事木名固讓丞相冬十二月加九錫之禮朝會不拜固讓九錫

二年春正月天子命帝立廟于洛陽置左右長史增掾屬舍人蒲十人歲舉掾屬任御史秀才各一人增官騎百人鼓吹十四人封子彤平樂亭侯倫安樂亭侯帝以父疾不任朝請每有大事天子親幸第以諮訪焉兗州刺史令狐愚太尉王凌貳於帝謀立楚王彪

三年春正月王凌詐言吳人塞涂水請發兵以討之帝潛知其計不聽夏四月帝自帥中軍汎舟泚流九日而到甘城凌計無所出乃迎于武丘面縛水次曰凌若有罪公當折簡召凌何苦自來耶帝曰以君非折簡之客故耳即以凌歸于京師道經賈逵廟凌呼曰賈梁道王凌是大魏之忠臣惟爾有神知之至項仰鵠而死收其餘黨皆夷三族并殺彪悉錄魏諸王公置于鄴命有司監察不得交關天子遣侍

中韋誕持節勞軍于五池帝至自甘城天子又使兼大鴻臚大僕庾
疑持節策命帝為相國封安平郡公孫及兄子各一人為列侯前後
食邑五萬戶侯者十九人固讓相國郡公不受六月帝寢疾夢賈逵
王凌為祟甚惡之秋八月戊寅崩于京師時年七十三天子素服臨
弔喪葬威儀依漢霍光故事追贈相國郡公弟孚表陳先志辭郡公
及輜輶車九月庚申葬于河陰謚曰文貞後改謚文宣先是預作終
制於首陽山為土藏不墳不樹作顧命三篇欽以時服不設明器後
終者不得合葬一如遺命晉國初建追尊曰宣王武帝受禪上尊號
曰宣皇帝陵曰高原廟稱高祖帝內忌而外寬猜忌多權變魏武察
帝有雄豪志聞有狼顧相欲驗之乃召使前行令反顧面正向後而
身不動又嘗夢三馬同食一槽甚惡焉因謂太子丕曰司馬懿非人
臣也必預汝家事太子素與帝善母相全佑故免帝於是勤於吏職
夜以忘寢至於芻牧之間悉皆臨履由是魏武意遂安及平公孫文
懿大行殺戮誅曹爽之際支黨皆夷及三族男女無少長姑姊妹女

子之適人者皆殺之既而竟遷魏鼎云明帝時王導侍坐帝問前世
所以得天下導乃陳帝創業之始及文帝末高貴鄉公事明帝以面
覆牀曰若如公言晉祚復安得長遠迹其猜忍蓋有符於狼顧也

制曰夫天地之大黎元爲本邦國之貴元首爲先治亂無常興亡有運
是故五帝之上居萬乘以爲憂三王已來處其憂而爲樂競智力爭
利害大小相吞強弱相襲逮乎魏室三方鼎峙干戈不息氣霧交飛
宣皇以天挺之姿應期佐命文以纘治武以稜威用人如在已求賢
若不及情深阻而莫測性寬綽而能容和光同塵与时舒卷戢鱗潛
翼思屬風雲飾忠於已詐之心延安於將危之命觀其雄略內斷英
猷外決殄公孫於百日擒于逵於盈旬自以兵動若神謀無再計矣
既而擁衆西舉与諸葛相持抑其甲兵本無關志遺其中悞方發憤
心杖節當門雄圖頓屈請戰千里詐欲示威且秦蜀之人勇懦非敵
夷險之路勞逸不同以此爭功其利可見而返閉軍固壘莫敢爭鋒
生怯實而未前死疑虛而猶遁良將之道失在斯乎文帝之世輔翼

權重許昌同蕭何之委崇華甚霍光之寄當謂竭誠盡節伊傳可齊
及明帝將終棟梁是屬受遺二主佐命三朝既承忍死之託曾無殉
生之報天子在外內起甲兵陵土未乾遽相誅戮身臣之體寧若此
乎盡善之方以斯為感夫征討之策豈東智而西愚輔佐之心何前
忠而後亂故晉明掩面恥欺偽以成功石勒肆言笑姦回以定業古
人有云積善三年知之者少為惡一日聞於天下可不謂然乎雖自
隱過當年而終見嗤後代亦猶竊鍾掩耳以衆人為不聞銳意盜金
謂市中為莫覩故知負於近者則遺遠溺於利者則傷名若不損已
以益人則當禍人而福已順理而舉易為力背時而動難為功況以未
成之晉基逼有餘之魏祚雖復道格區宇德被蒼生而天未啟時寶
位猶阻非可以智競不可以力爭雖則慶流後昆而身終於北面矣

帝紀卷第一

晉書一

虞詡書

晉書帝紀卷第二

晉書二

御撰

景帝 文帝

景皇帝諱師字子元宣帝長子也雅有風彩沉毅多大略少流美譽與夏侯玄何晏齊名晏常稱曰惟幾也能成天下之務司馬子元也魏景初中拜散騎常侍累遷中護軍為選用之法舉不越功吏無私焉宣穆皇后崩居喪以至孝聞宣帝之將誅曹爽深謀秘策獨與帝潛畫文帝弗之知也將發夕乃告之既而使人覘之帝寢如常而文帝不能安席晨會兵司馬門鎮靜內外置陣甚整宣帝曰此子竟可也初帝陰養死士三千散在人間至是一朝而集衆莫知所出也事平以功封長平鄉侯食邑千戶尋加衛將軍及宣帝薨議者咸云伊尹既卒伊陟嗣事天子命帝以撫軍大將軍輔政

魏嘉平四年春正月遷大將軍加侍中持節都督中外諸軍錄尚書事命百官舉賢才明少長卹窮獨理廢滯諸葛誕母丘儉王昶陳泰胡遵都督四方王基州泰鄧艾石苞典州郡盧毓李豐掌選舉傅嘏虞松叅

計謀鍾會夏侯玄王肅陳本孟康趙豐張緝預朝議四海傾注朝野肅然或有請改易制度者帝曰不識不知順帝之則詩人之美也三祖典制所宜遵奉自非軍事不得妄有改革

五年夏五月吳太傅諸葛恪圍新城朝議慮其分兵以寇淮泗欲戍諸水口帝曰諸葛恪新得政於吳欲徼一時之利并兵合肥以翼萬一不暇復爲青徐患也且水口非一多戍則用兵衆少戍則不足以禦寇恪果并力合肥卒如所度帝於是使鎮東將軍毋丘儉揚州刺史文欽等距之儉欽請戰帝曰恪卷甲深入投兵死地其鋒未易當且新城小而固攻之未可拔遂命諸將高壘以蔽之相持數月恪攻城力屈死傷大半帝乃勅欽督欽卒趣合楡要其歸路儉帥諸將以爲後繼恪懼而道欽逆擊大破之斬首萬餘給

正元元年春正月天子與中書令李豐右父光祿大夫張緝黃門監蘇鑠永寧署令樂敷穴從僕射劉寶賢等謀以大常夏侯玄代帝輔政帝密知之使舍人王羨以車迎豐豐見迫隨羨而至帝數之豐知禍及因

肆惡言帝怒遣勇士以刀鐮築殺之逮捕玄緝等皆夷三族三月乃諷
天子廢皇后張氏因下詔曰姦臣李豐等請譖庸回陰構凶慝大將軍
糾虔天刑致之誅辟周勃之克呂氏霍光之擒上官曷以過之其增邑
九千戶并前四萬帝讓不受天子以玄緝之誅深不自安而帝亦慮難
作潛謀廢立乃密諷魏永寧太后秋九月甲戌太后下令曰皇帝春秋
已長不親萬機耽淫內寵沉嫚女德日近倡優縱其醜虐迎六宮家人
留止內房毀人倫之叙亂男女之節又爲群小所迫將危社稷不可以
承奉宗廟帝召群臣會議流涕曰太后令如是諸君其如王室何咸曰
伊尹放太甲以寧殷霍光廢昌邑以安漢權定社稷以清四海二代行
之於古明公當之於今今日之事惟命是從帝曰諸君見望者重安敢
避之乃與群公卿士共奏太后曰臣聞天子者所以濟育群生永安萬
國皇帝春秋已長未親萬機日使小優郭懷表信等裸祖淫戲又於廣
望觀下作遼東妖婦道路行人莫不掩目清商令令狐景諫帝帝燒鐵
灸之太后遭合陽君喪帝嬉樂自若清商永龐熙諫帝帝弗聽太后還

北宮殺張美人帝甚美望熙諫帝怒復以彈彈熙每文書入帝不省視
太后令帝在式乾殿講學帝又不從不可以承天序臣請依霍光故事
收皇帝璽綬以齊王歸藩奏可於是有司以太牢策告宗廟王就乘輿
副車群臣從至西掖門帝泣曰先臣受歷世殊遇先帝臨崩託以遺詔
臣復忝重任不能獻可替否群公卿士遠惟舊典爲社稷深計寧負聖
躬使宗廟血食於是使使者持節衛送舍河內之重門誅郭懷表信等
是日與群臣議所立帝曰方今宇宙未清二虜爭衡四海之主惟在賢
哲彭城王據太祖之子以賢則仁聖明允以年則皇室之長天位至重
不得其才不足以寧濟六合乃與群公奏太后太后以彭城王先帝諸
父於昭穆之序爲不次則烈祖之世永無承嗣東海定王明帝之弟欲
立其子高貴鄉公髦帝固爭不獲乃從太后令遣使迎高貴鄉公於元
城而立之改元曰正元天子受璽隨舉趾高帝聞而憂之及將大會帝
訓於天子曰夫聖王重始正本苟初古人所慎也明當大會萬衆瞻穆
穆之容公卿聽玉振之音詩云示人不佻是則是效易曰出其言善則

千里之外應之雖禮儀周備猶宜加以祗恪以副四海顒顒式仰
癸巳天子詔曰朕聞創業之君必須股肱之臣守文之主亦賴匡佐之
輔是故文武以呂召彰受命之功宣王倚山甫耳中興之業大將軍世
載明德應期作輔遭天降險帝室多難齊王蒞政不迪率典公履義執
忠以寧區夏式是百辟揔齊庶事內摧寇虐外靜姦宄日具憂勤劬勞夙
夜德聲光于上下勲烈施于四方深惟大議首建明策權定社稷援立
朕躬宗廟獲安億兆慶賴伊摯之保乂躬邦公且之綏寧周室蔑以尚
焉朕甚嘉之夫德茂者位尊庸大者祿厚古今之通義也其登位相國
增邑九千并前四萬戶進號大都督假黃鉞入朝不趨奏事不名劔履
上殿賜錢五百萬帛五千匹以彰元勲帝固辭相國又上書訓於天子
曰荆山之璞雖美不琢不成其寶顏冉之才雖茂不學不弘其量仲尼
有云予非生而知之者好古敏以求之者也仰觀黃軒五代之主莫不
有所稟則顒顒受學於錄圖高辛問道於柏招逮至周成旦望作輔故能
離經辯志安道樂業夫然故君道明於上兆庶順於下刑措之隆實由

於此宜遵先王下問之義使講誦之業屢聞於聽典謨之言日陳於側也時天子頗修華飾帝又諫曰履端初政宜崇玄樸並劾納焉十一月有白氣經天

二年春正月有彗星見于吳楚之分西北竟天鎮東大將軍母丘儉楊州刺史文欽舉兵作亂矯太后令移檄郡國爲壇盟於西門之外各遣子四人質于吳以請救二月儉欽帥衆六萬渡淮而西帝會公卿謀征許朝議多謂可遣諸將擊之王肅及尚書傅嘏中書侍郎鍾會勸帝自行戊午帝統中軍步騎十餘萬以征之倍道兼行召三方兵大會于陳許之郊甲申次于隱橋儉將史招李續相次來降儉欽移入項城帝遣荊州刺史王基進據南頓以逼儉帝深壁高壘以待東軍之集諸將請進軍攻其城帝曰諸君得其一未知其二淮南將士本無反志且儉欽欲蹈縱橫之迹習儀秦之說謂遠近必應而事起之日淮北不從史招李續前後瓦解內乖外叛自知必敗困獸思鬪速戰更合其志雖云必剋傷人亦多且儉等欺誑將士詭變萬端小與持久詐情自露此不戰

而剋之也乃遣諸葛誕督豫州諸軍自安風向壽春征東將軍胡遵督青徐諸軍出譙宋之間絕其歸路帝屯汝陽遣兗州刺史鄧艾督太山諸軍進屯樂嘉示弱以誘之欽進軍將攻艾帝潛軍銜枚徑造樂嘉與欽相遇欽子騫年十八勇冠三軍謂欽曰及其未定請登城鼓譟擊之可破也既謀而行三譟而欽不能應騫退相與引而東帝謂諸將曰欽走矣命發銳軍以追之諸將皆曰欽舊將騫少而銳引軍內入未有失利必不走也帝曰一鼓作氣再而衰三而竭騫三鼓欽不應其勢已屈不走何待欽將遁騫曰不先折其勢不得去也乃與驍騎十餘摧鋒陷陣所向皆披靡遂引去帝遣左長史司馬璉督驍騎八千翼而追之使將軍樂綝等督步兵繼其後比至沙陽頻陷欽陣弩矢雨下欽蒙楯而馳大破其軍衆皆投戈而降欽父子與麾下走保項儉聞欽敗棄衆宵遁淮南安風津都尉追儉斬之傳首京都欽遂奔吳淮南平初帝目有瘤疾使醫割之騫之來攻也驚而目出懼六軍之恐蒙之以被痛甚齧被敗而左右莫知焉閏月疾篤使文帝撫統諸軍辛亥崩于許昌時年四

十八月帝之喪至自許昌天子素服臨弔詔曰公有濟世寧國之勲
剋定禍亂之功重之以死王事宜加殊禮其令公卿議制有司議以為
忠安社稷功濟宇內宜依霍光故事追加大司馬之號以冠軍大將軍
增邑五萬戶謚曰武公文帝表讓曰臣亡父不敢受丞相相國九命之
禮亡兄不敢受相國之位誠以太祖常所階歷也今謚與二祖同必所
祇懼昔蕭何張良霍光咸有匡佐之功何謚文終良謚文成光謚宣成
必以文武為謚請依何等就加詔許之謚曰忠武晉國既建追尊曰景
王武帝受禪上尊號曰景皇帝陵曰峻平廟稱世宗

文皇帝諱昭字子景帝之母弟也魏景初三年封新城鄉侯正始初
為洛陽典農中郎將值魏明奢侈之後帝蠲除苛碎不奪農時百姓
大悅轉散騎常侍大將軍曹爽之伐蜀也以帝為征蜀將軍副夏侯玄
出駱谷次于興勢蜀將王林夜襲帝營帝堅卧不動林退帝謂玄曰費
禕以據險距守進不獲戰攻之不可宜亟旋軍以為後圖爽等引旋禕
果馳兵趣三嶺爭險乃得過遂還拜議郎及誅曹爽帥眾衛二宮以功

增邑千戶蜀將姜維之寇隴右也征西將軍郭淮自長安距之進帝位
安西將軍持節屯關中爲諸軍節度淮攻維別將句安於麴久而不決
帝乃進據長城南趣駱谷以疑之維懼退保南鄭安軍絕援帥衆來降
轉安東將軍持節鎮許昌及大軍討王凌帝督淮北諸軍事帥師會于
項增邑三百戶假金印紫綬尋進號都督統征東將軍胡遵鎮東將軍
諸葛誕伐吳戰于東關二軍敗績坐失侯蜀將姜維又寇隴右揚聲欲
攻狄道以帝行征西將軍次長安雍州刺史陳泰欲先賊據狄道帝曰
姜維攻羌收其質任聚穀作邸閣訖而復轉行至此正欲了塞外諸羌
爲後年之資耳若實向狄道安肯宣露令外人知今揚聲言出此欲歸
也維果燒營而去會新平羌胡叛帝擊破之遂耀兵靈州北虜震龍
者悉降以功復封新城侯高貴鄉公之立也以參定策進封高都侯
增封二千戶母丘儉文欽之亂大軍東征帝兼中領軍留鎮洛陽及景
帝疾篤帝自京都省疾拜衛將軍景帝崩天子命帝鎮許昌尚書傳嘏
帥六軍還京師帝用嘏及鍾會策自帥軍而還至洛陽進位大將軍加

侍中都督中外諸軍錄尚書事輔政劔履上殿帝固辭不受

甘露元年春正月加大都督奏事不名夏六月進封高都公地方七百
里加之九錫假斧鉞進號大都督劔履上殿又固辭不受秋八月庚申
加假黃鉞增封三縣

二年夏五月辛未鎮東大將軍諸葛誕殺揚州刺史樂綝以淮南作亂
遣子覲為質於吳以請救議者請速伐之帝曰誕以母丘儉輕疾傾覆
今必外連吳寇此為變大而逢吾當與四方同力以全勝制之乃表曰
昔黥布叛逆漢祖親征隗囂違戾光武西伐烈祖明皇帝乘輿仍出皆
所以奮揚赫斯震耀威武也陛下宜覽臨戎使將士得憑天威今諸軍
可五十萬以衆擊寡蔑不克矣秋七月奉天子及皇太后東征徵兵青
徐荆豫分取關中遊軍皆會淮北師次于項假廷尉何植節使淮南宣
慰將士申明逆順示以誅賞甲戌帝進軍丘頭吳使文欽唐咨全端全
懌等三萬餘人來救誕諸將逆擊不能禦將軍李廣臨敵不進泰山太
守常時稱疾不出並斬之以徇八月吳將朱異帥兵萬餘人留輜重於

都陸輕兵至黎漿監軍石苞兖州刺史州泰禦之異退泰山太守胡烈以奇兵襲都陸焚其糧運苞泰復進擊異大破之異之餘卒餒甚食葛葉而遁吳人殺異帝曰異不得至壽春非其罪也而吳人殺之適以謝壽春而堅誕意使其猶望救耳若其不爾彼當突圍決一旦之命或謂大軍不能久省食減口異有他變料賊之情不出此三者今當多方以亂之備其越逸此勝計也因命合圍分遣羸疾就穀淮北廩軍士大豆人三升欽聞之果喜帝愈羸形以示之多縱反間揚言吳救方至誕等益寬恣食俄而城中乏糧石苞王基並請攻之帝曰誕之逆謀非一朝一夕也聚糧完守外結吳人自謂足據淮南欽既同惡相濟必不便走今若急攻之損將軍之力外寇卒至表裏受敵此危道也今三叛相聚於孤城之中天其或者將使同戮吾當以長策縻之但堅守三面若賊陸道而來軍糧必少吾以將兵輕騎絕其轉輸可不戰而破外賊外賊破欽等必成擒矣全懌母孫權女也得罪於吳全端兄子禕及儀奉其母來奔儀兄靜時在壽春用鍾會計作禕儀書以譎靜靜兄弟五人帥其

衆來降城中大駭

三年春正月壬寅誕欽等出攻長圍諸軍逆擊走之初誕欽內不相協及至窮蹙轉相疑貳會欽計事與誕忤誕手刃殺欽子鴛攻誕不克踰城降以爲將軍封侯使鴛巡城而呼帝見城上持弓者不發謂諸將曰可攻矣二月乙酉攻而拔之斬誕夷三族吳將唐咨孫曼孫彌徐韶等帥其屬皆降表加爵位廩其餒疾或言吳兵必不爲用請坑之帝曰就令亡還適見中國之弘耳於是徙之三河夏四月歸于京師魏帝命改丘頭曰武丘以旌武功五月天子以并州之太原上黨西河樂平新興鴈門司州之河東平陽八郡地方七百里封帝爲晉公加九錫進位相國晉國置官司焉九讓乃止於是增邑萬戶食三縣諸子之無爵者皆封列侯秋七月奏錄先世名臣元功大勲之子孫隨才叙用

四年夏六月分荊州置二都督王基鎮新野州泰鎮襄陽使石苞都督揚州陳騫都督豫州鍾毓都督徐州宋鈞監青州諸軍事

景元元年夏四月天子復命帝爵秩如前又讓不受天子旣以帝三世

宰輔政非已出情不能安又慮廢辱將臨軒召百寮而行放黜五月戊子夜使穴從僕射李昭等發甲於陵雲臺召侍中王沉散騎常侍王業尚書王經出懷中黃素詔示之戒嚴俟旦沉業馳告于帝帝召護軍賈充等爲之備天子知事泄帥左右攻相府稱有所討敢有動者族誅相府兵將止不敢戰賈充叱諸將曰公畜養汝輩正爲今日耳太子舍人成濟抽戈犯蹕刺之刃出於背天子崩于車中帝召百寮謀其故僕射陳泰不至帝遣其舅荀顗輿致之延于曲室謂曰玄伯天下其如我何泰曰惟腰斬賈充微以謝天下帝曰卿更思其次泰曰但見其上不見其次於是歸罪成濟而斬之太后令曰昔漢昌邑王以罪廢爲庶人此兒亦宜以庶人禮葬之使外內咸知其所行也殺尚書王經貳於我也庚寅帝奏曰故高貴鄉公帥從駕人兵拔刃鳴鼓向臣所臣懼兵刃相接即勅將士不得有所傷害違令者以軍法從事騎督成倅第太子舍人濟入兵陣傷公至墮臣聞人臣之節有死無貳事上之義不敢逃難前者變故卒至禍同發機誠欲委身守死惟命所裁然惟本謀乃欲上

危皇太后傾覆宗廟臣忝當元輔義在安國即駱驛申勅不得迫近輿輦而濟妄入陣間以致大變哀怛痛恨五內摧裂濟干國亂紀罪不容誅輒收濟家屬付廷尉太后從之夷濟三族與公卿議立燕王宇之子常道鄉公璜爲帝六月改元景辰天子進帝爲相國封晉公增十郡加九錫如初群從子弟未侯者封亭侯賜錢千萬帛萬匹固讓乃止冬十一月吳吉陽督蕭慎以書詣鎮東將軍石苞僞降求迎帝知其詐也使苞外示迎之而內爲之備

二年秋八月甲寅天子使太尉高柔授帝相國印綬司空鄭沖致晉公茅土九錫固辭

三年夏四月肅愼來獻楷矢石砮弓甲貂皮等天子命歸於大將軍府四年春二月丁丑天子復命帝如前又固辭三月詔大將軍府增置司馬一人從事中郎二人舍人十人夏帝將伐蜀乃謀衆曰自定壽春已來息役六年治兵繕甲以擬二虜略計取吳作戰船通水道當用千餘萬功此十萬人百數十日事也又南土下溼必生疾疫今宜先取蜀三年

之後因巴蜀順流之勢水陸並進此滅虞定號吞韓并魏之勢也計蜀
戰士九萬居守成都及備他境不下四萬然則餘衆不過五萬今紿姜
維於沓中使不得東顧直指駱谷出其空虛之地以襲漢中彼若嬰城
守險兵勢必散首尾離絕舉大衆以屠城散銳卒以略野劔閣不暇守
險關頭不能自存以劉禪之闇而邊城外破士女內震其亡可知也征
西將軍鄧艾以爲未有興廢屢陳異議帝患之使主簿師纂爲艾司馬以
喻之艾乃奉命於是徵四方之兵十八萬使鄧艾自狄道攻姜維於沓
中雍州刺史諸葛緒自祁山軍于武街絕維歸路鎮西將軍鍾會帥前將
軍李輔征蜀護軍胡烈等自駱谷龍襄漢中秋八月軍發洛陽大賚將士
陳師誓衆將軍鄧敷謂蜀未可討帝斬以徇九月又使天水太守王頌
攻維營隴西太守牽弘邀其前金城太守楊欣趣甘松鍾會分爲二隊入
自斜谷使李輔圍王含於樂城又使部將易愷攻蔣斌於漢城會直指
陽安護軍胡烈攻陷關城姜維聞之引還王頌追敗維於強川維與張
翼廖化合軍守劔閣鍾會攻之冬十月天子以諸侯獻捷交至乃申前命

曰朕以寡德獲承天序嗣我祖宗之洪烈遭家多難不明于訓曩者
茲逆屢興方寇內侮大懼淪喪四海以隳三祖之弘業惟公經德履哲
明允廣深迪宣武文世作保傅以輔又皇家擲風沐雨周旋征伐劬勞
王室二十有餘載毗翼前人仍斷大政克戢不端維安社稷暨儉欽之
亂公綏援有衆分命興師統紀有方用緝寧淮浦其後巴蜀屢侵西土
不靖公竒畫指授制勝千里是以段谷之戰爭輿大捷斬將搃旗效首萬
計孫峻猾夏致寇徐方戎車首路威靈先邁黃鉞未啓鯨鯢宵迹孫
壹搆隙自相疑阻幽鑒遠照竒策洞微遠人歸命作藩南夏爰授銳卒
畢力戎行旣諸葛誕滔天作逆稱兵揚楚欽咨逋罪同惡相濟帥其螫
賊以入壽春憑阻淮山敢距王命公躬擐甲冑龍其行天罰玄謀廟筭遵
養時晦竒兵震擊而朱異摧破神變應機而全琮稽服取亂攻昧而高
壩不守兼九伐之弘略究五兵之正度用能戰不窮武而大敵殲潰旗
不再麾而元勳授首收勅吳之雋臣係亡命之逋虜交臂屈膝委命下
吏俘馘十萬積尸成京雪宗廟之滯恥拯兆庶之艱難掃平區域信威

吳會遂戢干戈靜我疆土天地鬼神罔不獲乂乃者王室之難變起蕭牆賴公之靈弘濟艱險宗廟危而獲安社稷墜而復寧忠格皇天功濟六合是用疇咨古訓稽諸典籍命公崇位相國加于群后啓土參虛封以晉域所以方軌齊魯翰屏帝室而公遠蹈謙損深履沖讓固辭策命至于八九朕重違讓德抑禮虧制以彰公志于今四載上闕在昔建侯之典下違兆庶具瞻之望惟公嚴虔王度闡濟大猷敦尚純樸省繇節用務穡勸分九野康乂耆叟荷崇養之德鰥寡蒙矜卹之施仁風興於中夏流澤布於遐荒是以東夷西戎南蠻北狄狂狡貪悍世爲寇讎者皆感義懷惠款塞內附或委命納貢或求置官司九服之外絕域之氓曠世所希至者咸浮海來享鼓舞王德前後至者八百七十餘萬口海隅幽裔無思不服雖西旅遠貢越裳九譯義無以踰維翼朕躬下匡萬國思靖殊方寧濟人極以庸蜀未賓蠻荆作猾潛謀獨斷整軍經武簡練將帥授以成策始踐賊境應時摧陷狂狡奔北首尾震潰禽其戎帥屠其城邑巴漢震疊江源雲徹地平天成誠在斯舉公有濟六

合之勲加以茂德實摠百揆允釐庶政敷五品以崇仁恢六典以敷訓而靖恭夙夜勞謙昧且雖尚父之左右文武周公之勤勞王家罔以加焉昔宣王選建德光啓諸侯體國經野方制五等所以藩翼王畿垂祚百世也故齊魯之封於周爲弘山川土田邦畿七百官司典策制殊群后惠襄之難桓文以翼戴之勞猶受錫命之禮咸用光疇大德作範于後惟公功邁於前列而賞闕於舊式百辟於邑人神同恨焉豈可以公謙冲而久淹弘典哉今以并州之太原上黨西河樂平新興鴈門司州之河東平陽弘農雍州之馮翊凡十郡南至于華北至于陘東至于壺口西踰于河提封之數方七百里皆晉之故壤唐叔受之世作盟王實紀綱諸夏用率舊職爰胙茲土封公爲晉公命使持節兼司徒司隸校尉陔即授印綬策書金獸符第一至第五竹使符第七至第十錫茲玄土苴以白茅建爾國家以永藩魏室昔在周召並以公侯入作保傳其在近代鄭侯蕭何實以相國光尹漢朝隨時之制禮亦宜之今進公位爲相國加綠綬綬又加公九錫其勳聽後命以公思弘大猷崇正典禮

儀刑作範旁訓四方是用錫公大輅戎輅各一玄牡二駟公道和陰陽
酌授人時嗇夫及本農殖維豐是用錫公衮冕之服赤舄副焉公光敷
顯德惠下以和韶信思順庶尹允諧是用錫公軒懸之樂六佾之舞公
鎮靖宇宙翼播聲教海外懷服荒裔款附殊方馳義諸夏順軌是用
錫公朱戶以居公簡賢料材營求俊逸爰升多士宣彼周行是用錫公
納陛以登公嚴恭寅畏底平四國式遏寇虐苛厲不作是用錫公武賁
之士三百人公明慎用刑簡恤大中章厥天威以糾不虔是用錫公鉞
鉞各一公爰整六軍典司征伐犯命陵正乃維誅殛是用錫公彤弓一
彤矢百旅弓十旅矢千公饗祀蒸蒸孝思惟則篤誠之至通于神明是
用錫公鉅鬯一卣珪瓚副焉晉國置官司以下率由舊式往欽哉祗服
朕命弘敷訓典光澤庶方永終爾明德不顯余一人之休命公卿將校皆
詣府喻旨帝以禮辭讓司空鄭冲率群官勸進曰伏見嘉命顯至竊聞
明公固讓冲等眷眷實有愚心以為聖王作制百代同風褒德賞功
有自來矣昔伊尹有莘氏之媵臣耳一佐成湯遂荷阿衡之號周公藉

已成之勢據旣安之業光宅曲阜奄有龜蒙呂尚磻溪之漁者也一朝
指麾乃封營丘自是以來功薄而賞厚者不可勝數然賢哲之士猶
以爲美談況自先相國以來世有明德翼輔魏室以綏天下朝無批政
人無謗言前者明公西征靈州北臨沙漠榆中以西望風震服羌戎來
馳迴首內向東誅叛逆全軍獨剋禽闔閭之特虜輕銳之卒以萬萬計
威加南海名懾三越宇內康寧苛慝不作是以時俗畏懷東夷獻舞故
聖上覽乃昔以來禮典舊章開國光宅顯茲太原明公宜承奉聖旨受
茲介福允當天人元功盛勲光光如彼國土嘉祚魏魏如此內外協同
靡衍靡非達由斯征伐則可朝服濟江掃除吳會西塞江源望祀岷山迴
戈弭節以麾天下遠無不服邇無不肅今天魏之德光于唐虞明公盛
勲超於桓文然後臨滄海而謝文伯登箕山而揖許由豈不盛乎至公
至平誰與爲鄰何必勤勤小讓也哉帝乃受命十一月鄧文帥萬餘人
自陰平踰絕險至江由破蜀將諸葛瞻於綿竹斬瞻傳首進軍雒縣劉
禪降天子命晉公以相國總百揆於是上節傳去侍中大都督錄尚書之

號焉表鄧文爲太尉鍾會爲司徒會潛謀叛逆因密使譖文

咸熙元年春正月檻車徵文乙丑帝奉天子西征次于長安是時魏諸王侯悉在鄴城命從事中郎山濤行車司事鎮於鄴遣護軍賈充持節督諸軍據漢中鍾會遂反於蜀監軍衛瓘右將軍胡烈攻會斬之初會之伐蜀也西曹屬蜀邵懷言於帝曰鍾會難信不可令行帝笑曰取蜀如指掌而衆人皆言不可唯會與吾意同滅蜀之後中國將士人自思歸蜀之遺黎猶懷震恐縱有異志無能爲也卒如所量景辰帝至自長安三月己卯進帝爵爲王增封并前二十郡夏五月癸未天子追加舞陽宣文侯爲晉宣王舞陽忠武侯爲晉景王秋七月帝奏司空荀顗定禮儀中護軍賈充正法律尚書僕射裴秀議官制太保鄭冲摠而裁焉始建五等爵冬十月丁亥奏遣吳人相國參軍徐劭散騎常侍水曹屬孫或使吳喻孫皓以平蜀之事致馬錦等物以示威懷景午天子命中撫軍新昌鄉侯炎爲晉世子

二年春二月甲辰胸臆縣獻靈龜歸於相府夏四月孫皓使紀陟來聘

且獻方物五月天子命帝冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鍾虡宮懸位在燕王上進王妃爲王后世子爲太子王女王孫爵命之號皆如帝者之儀諸禁網煩苛及法式不便於時者帝皆奏除之晉國置御史大夫侍中常侍尚書中領軍衛將軍官秋八月辛卯帝崩于露寢時年五十五九月癸酉葬崇陽陵謚曰文王武帝受禪追尊號曰文皇帝廟稱太祖

史臣曰世宗以叡略創基太祖以雄才成務事殷之迹空存翦商之志彌遠三分天下功業在焉及踰劔銷氛浮淮靜亂桐宮有怨或所不堪若乃體以名臣格之端揆周公流連於此歲魏武得意於茲日軒懸之樂大啓南陽師摯之圖於焉北面壯矣哉包舉天人者也爲帝之主不亦難乎 贊曰世宗繼文邦權未分三千之士其從如雲世祖無外靈關靜氛反雖討賊終爲弑君

帝紀第三

晉書三

武帝

御撰

武皇帝諱炎字安世文帝長子也寬惠仁厚深沉有度量魏嘉平中封
北平亭侯歷給事中奉車都尉中壘將軍加散騎常侍累遷中護軍假
節迎常道鄉公於東武陽遷中撫軍進封新昌鄉侯及晉國建立為世
子拜撫軍大將軍開府副貳相國初文帝以景帝既宣帝之嫡早世無
後以帝弟攸為嗣特加愛異自謂攝居相位百年之後大業宜歸攸每曰
此景王之天下也吾何與焉將議立世子屬意於攸何曾等固爭曰中撫軍
聰明神武有超世之才髮委地手過膝此非人臣之相也由是遂定
咸熙二年五月立為晉王太子八月辛卯文帝崩太子嗣相國晉王位下
令寬刑宥罪撫衆息役國內行服三日是月長人見於襄武長三丈告
縣人王始曰今當太平九月戊午以魏司徒何曾為丞相鎮南將軍王
沉為御史大夫中護軍賈充為衛將軍議郎裴秀為尚書令光祿大夫
皆開府十一月初置四護軍以統城外諸軍乙未令諸郡中正以六條

舉淹滯一曰忠恪匪躬二曰孝敬盡禮三曰友于兄弟四曰絜身勞謙
五曰信義可復六曰學以爲己是時晉德既洽四海宅心於是天子知
歷數有在乃使太保鄭冲奉策曰咨爾晉王我皇祖有虞氏誕膺靈運
受終于陶唐亦以命于有夏惟三后陟配于天而咸用光敷聖德自茲
厥後天又輯大命于漢火德既衰乃眷命我高祖方軌虞夏四代之明
顯我不敢知惟王乃祖乃父服膺明哲輔亮我皇家勲德光于四海格
爾上下神祇罔不克順地平天成萬邦以乂應受上帝之命協皇極之
中肆予一人祗承天序以敬授爾位歷數實在爾躬允執其中天祿永
終於戲王其欽順天命率循訓典底綏四國用保天休無替我二皇之
弘烈帝初以禮讓魏朝公卿何曾王沉等固請乃從之

泰始元年冬十二月景寅設壇于南郊百僚在位及匈奴南單于四夷
會者數万人柴燎告類于上帝曰皇帝臣炎敢用玄牡明告于皇皇后
帝魏帝稽協皇運紹天明命以命炎昔者唐堯熙隆大道禪位虞舜舜
又以禪禹邁德垂訓多歷年載暨漢德既衰太祖武皇帝撥亂濟時扶

翼劉氏又用受命于漢粵在魏室仍世多故幾於顛隳寔賴有晉匡拯之德用獲保厥肆祀弘濟于艱難此則晉之有大造于魏也誕惟四方罔不祇順鄒清梁岷包懷揚越八紘同軌祥瑞屢臻天人協應無思不服肆予憲章三后用集太命于茲炎維德不嗣辭不獲命於是君羣公卿士百辟庶僚黎獻陪隸暨于百變君長僉曰皇天鑒下求人之瘼既有成命固非克讓所得距違天序不可以無統人神不可以曠主炎虔奉皇運寅畏天威斂簡元辰升壇受禪告類上帝永荅衆望禮畢即洛陽宮幸太極前殿詔曰昔朕皇祖宣王聖哲欽明誕膺期運熙帝之載肇啓洪基伯考景王履道宣猷緝熙諸夏至于皇考文王徽哲光遠允協靈祇應天順時受茲明命仁濟于宇宙功格于上下肆魏氏弘鑒于古訓儀刑于唐虞疇咨群后爰輯太命于朕身予一人畏天之命用不敢違惟朕寡德負荷洪烈託于王公之上以君臨四海惴惴惟懼罔知所濟惟爾股肱爪牙之佐文武不貳之臣乃祖乃父實左右我先王光隆我大業思與萬國共饗養休祚於是大赦改元賜天下爵人五級鰥寡孤獨

不能自存者穀人五斛復天下租賦及關市之稅一年逋債宿負皆勿
收除舊嫌解禁錮亡官失爵者悉復之丁卯遣太僕劉原告于太廟封
魏帝爲陳留王邑万户居于鄴宮魏氏諸王皆爲縣侯追尊宣王爲宣
皇帝景王爲景皇帝文王爲文皇帝宣王妃張氏爲宣穆皇后尊太妃
王氏曰皇太后宮曰崇化封皇叔祖父孚爲安平王皇叔父幹爲平原
王亮爲扶風王仲爲東莞王駿爲汝陰王彤爲梁王倫爲琅邪王皇弟
攸爲齊王鑒爲樂安王幾爲燕王皇從伯父望爲義陽王皇從叔父輔
爲渤海王晃爲下邳王瓌爲太原王珪爲高陽王衡爲常山王子文爲
沛王泰爲隴西王權爲彭城王綏爲范陽王遂爲濟南王遜爲譙王睦
爲中山王淩爲北海王斌爲陳王皇從父兄洪爲河間王皇從父弟楨
爲東平王以驃騎將軍石苞爲大司馬封樂陵公車騎將軍陳騫爲高
平公衛將軍賈充爲車騎將軍魯公尚書令裴秀爲鉅鹿公侍中荀勗
爲濟北公太保鄭冲爲太傅壽光公太尉王祥爲太保睢陵公丞相何
曾爲太尉卽陵公御史大夫王沉爲驃騎將軍博陵公司空荀顗爲臨

淮公鎮北大將軍衛瓘為舊防其餘增封進爵各有差文武普增位二等改景初歷為泰始歷臘以西社以丑戌辰下詔大弘儉約出御府珠玉玩好之物頒賜王公以下各有差置中軍將軍以統宿衛七軍己已詔陳留王載天子旌旗備五時副車行魏正朔郊祀天地禮樂制度皆如魏舊上書不稱臣賜山陽公劉康安樂公劉禪子第一人為駙馬都尉乙亥以安平王孚為太宰假黃鉞大都督中外諸軍事詔曰昔王凌謀廢齊王而王竟不足以守位鄧艾雖矜功失節然束手受罪今大赦其家還使立後興滅繼絕約法省刑除魏氏宗室禁錮諸將吏遭三年喪者遣寧終喪百姓復其徭役罷部曲將長吏以下質任省郡國御調禁樂府靡麗百戲之伎及雕文游畋之具開直言之路置諫官以掌之是月鳳凰六青龍三白龍二麒麟各一見于郡國

二年春正月景戍遣兼侍中侯史光等持節四方循省風俗除襍祀之不在祀典者于亥有司請建七廟帝重其役不許庚寅罷雞鳴歌辛丑尊景皇帝夫人羊氏曰景皇后宮曰弘訓景午立皇后楊氏二月除漢

宗室禁錮己未常山王衡薨詔曰五等之封皆錄舊勳本為縣侯者傳封次子為亭侯為鄉侯為關內侯亭侯為關中侯皆食本戶十分之一丁丑郊祀宣皇帝以配天宗祀文皇帝於明堂以配上帝庚午詔曰古者百官官箴王闕然保氏特以諫諍為職今之侍中常侍實處此位擇其能正色弼違匡救不逮者以兼此選三月戊戌吳人來弔祭有司奏為荅詔帝曰昔漢文光武懷撫尉佗公孫述皆未正君臣之儀所以羈縻未賓也皓遣使之始未知國慶但以書荅之夏五月戊辰詔曰陳留王操尚謙冲每事輒表非所以優崇之也主者喻意非大事皆使王官表上之壬子驃騎將軍博陵公王沉卒六月壬申濟南王遂薨秋七月辛巳營太廟致荆山之木采華山之石鑄銅柱十二塗以黃金鏤以百物綴以明珠戊戌譙王遜薨景午晦日有蝕之八月景辰省右將軍宮初帝雖從漢魏之制既葬除服而深衣素冠降席撤膳哀慟如喪者戊辰有司奏改服進膳不許遂禮終而後復吉及太后之喪亦如之九月乙未散騎常侍皇甫陶傳玄頌諫官上書諫諍有司奏請寢之詔曰凡

關言人主所至難而苦不能聽納自古忠臣直士之所慷慨也每
陳事出付主者多從深刻乃云恩貸當由主上是何言乎其詳評議
成有司奏大晉繼三皇之蹤蹈舜禹之迹應天順時受禪有魏宜一用
前代正朔服色皆如虞夏遵唐故事奏可冬十月景牛朔日有蝕之丁未
詔曰昔舜葬蒼梧農不易畝禹葬成紀市不改肆上惟祖考清簡之言
所徙陵十里內居人動爲煩擾一切停之十月己卯倭來獻方物并
園丘方丘於南北郊二至之祀合於二郊罷山陽公國督軍除其禁制
己丑追尊景帝夫人夏侯氏爲景懷皇后辛卯遷祖禰神主于太廟十
二月罷農官爲郡縣是歲鳳皇六青龍十黃龍九麒麟各一見于郡國
○三年春正月癸丑白龍二見于弘農澗池丁卯立皇子衷爲皇太子詔
曰朕以不德託于四海之上兢兢祗畏懼無以康濟寓內恩與天下式
明王度正本清源於置胤樹嫡非所先務又近世每見太子寬宥施惠
之事間不獲已順從王公卿士之議耳方今世運垂平將陳之以德義
示之以好惡使百姓蠲多幸之慮篤終始之行曲惠小仁故無取焉咸

使知聞三月戊寅初令二千石得終三年喪丁未晝昏罷武衛將軍官以李喜為太子太傅太山石崩夏四月戊午張掖太守焦勝上言氏池縣大柳谷口有玄石一所白晝成文實大晉之休祥圖之以獻詔以制幣告于太廟藏之天府秋八月罷都護將軍以其五署還光祿勳九月甲申詔曰古者以德詔爵以庸制祿雖下士猶食上農外足以奉公忘私內足以養親施惠今在位者祿不代耕非所以崇化之本也其議增吏俸賜王公以下帛各有差以太尉何曾為太保義陽王望為太尉司空荀顗為司徒冬十月聽士卒遭父母喪者非在疆場皆得奔赴十二月徙宗聖侯孔震為奉聖亭侯山陽公劉康來朝禁星氣讖諱之學四年春正月辛未以尚書令裴秀為司空景戌律令成封爵賜帛各有差有星孛于軫丁亥帝耕于籍田戊子詔曰古設象刑而衆不犯今雖參夷而姦不絕何德刑相去之遠哉先帝深愍黎元哀矜庶獄乃命群后考正典刑朕守遺業永惟保乂皇基思與萬國以無為為政方今陽春養物東作始興朕親率王公卿士耕籍田千畝又律令既就班之天

下將以簡法務本惠育海內宜寬有罪使得自新其大赦天下長吏郡丞長史各賜馬一匹二月庚子增置山陽公國相郎中令雜工宰人鼓吹車馬各有差罷中軍將軍置北軍中候官甲寅以東海劉儉有至行拜爲郎以中軍將軍羊祜爲尚書左僕射東莞王伉爲尚書右僕射三月戊子皇太后王氏崩夏四月戊戌太保睢陵公王祥薨己亥祔葬文明皇后王氏於崇陽陵罷振威揚威護軍官置左右積弩將軍六月甲申朔詔曰郡國守相三載一巡行屬縣必以春此古者所以述職宣風展義也見長吏觀風俗協禮律考度量存問老日老親見百年錄囚徒理冤枉詳察政刑得失知百姓所患苦無有遠近便若朕親臨之敦喻五教勸務農功勉勵學者思勤正典無爲百家庸末致遠必泥士庶有好學篤道孝悌忠信清白異行者舉而進之有不孝敬於父母不長悌於族黨悖禮棄常不率法令者糾而罪之田疇闢生業脩禮教設禁令行則長吏之能也人窮鬻農事荒姦盜起刑獄煩下陵上替禮義不興斯長吏之否也若長吏在官公廉慮不及私正色直節不飾名譽者

及身行貪穢諂黷求容公節不立而私門日富者並謹察之揚清激濁
舉善彈違此朕所以垂拱摠綱責成於良二千石也於戲戒哉秋七月
太山石崩衆星西流戊午遣使者侯史光循行天下己卯謁崇陽陵九
月青徐兗豫四州大水伊洛溢合於河開倉以振之詔曰雖詔有所欲
及奏得可而於事不便者皆不可隱情冬十月吳將施績入江夏萬郁
寇襄陽遣太尉義陽王望屯龍陂荊州刺史胡烈擊敗郁吳將顧容寇
鬱林太守毛晃大破之斬其交州刺史劉俊將軍脩則十月吳將李奉
等出埭陂安東將軍汝陰王駿與義陽王望擊走之己未詔王公卿尹
及郡國守相舉賢良方正直言之士十二月班五條詔書於郡國一曰正
身二曰勤百姓三曰撫孤寡四曰敦本息末五曰去人事庚寅帝臨聽
訟觀錄廷尉洛陽獄囚親平決焉扶南林邑各遣使來獻

五年春正月癸巳申戒郡國計吏守相令長務盡地利禁游食商販景
申帝臨聽訟觀錄囚徒多所原遣青龍二見於滎陽二月以雍州隴右
五郡及涼州之金城梁州之平陽置秦州辛巳白龍二見於趙國青徐

充三州水遣使振恤之王寅以尚書左僕射辛祐都督荊州諸軍事征東大將軍衛瓘都督青州諸軍事東莞王宙鎮東大將軍都督徐州諸軍事丁亥詔曰古者歲書群吏之能否三年而誅賞之諸令史前後但簡遺疎劣而無有勸進非黜陟之謂也其條勤能有稱尤異者歲以爲常吾將議其功勞已未詔蜀相諸葛亮孫京隨才署吏夏四月地震五月辛卯朔鳳皇見于趙國曲赦交趾九真日南五歲刑六月鄴奚官督郭廩上疏陳五事以諫言甚切直擢爲屯留令西平人麴路伐登聞鼓言多祆謗有司奏棄帝曰朕之過也捨而不問罷鎮軍將軍復置左右將軍官秋七月延群公詢讜言九月有星孛于紫宮冬十月景子以汲郡太守王宏有政績賜穀千斛十一月追封謚皇弟北爲城陽哀王以皇子景度嗣十二月詔州郡舉勇猛秀異之才

六年春正月丁亥朔帝臨軒不設樂吳將丁奉入渦口揚州刺史牽弘擊走之三月赦五歲刑已下夏四月白龍二見於東莞五月立壽安亭侯承爲南宮王六月戊午秦州刺史胡烈擊叛虜於萬斛堆力戰死之

詔遣尚書石鑒行安西將軍都督秦州諸軍事與奮威護軍田章討之
秋七月丁酉復隴右五郡遇寇害者租賦不能自存者廩貸之乙巳城
陽王景度薨詔曰自泰始以來大事皆撰錄祕書寫副後有其事輒宜
綴集以爲常丁未以汝陰王駿爲鎮西大將軍都督雍涼三州諸軍事
九月大宛獻汗血馬焉耆來貢方物冬十一月幸辟雍行鄉飲酒之禮
賜太常博士學生帛牛酒各有差立皇子柬爲汝南王十二月吳夏口
督前將軍孫秀帥衆來奔拜驃騎將軍開府儀同三司封會稽公戊辰
復置鎮軍官

七年春正月景午皇太子冠賜王公以下帛各有差匈奴帥劉猛叛出
塞三月孫皓帥衆趨壽陽遣大司馬望屯淮北以距之三月景戌司空
鉅鹿公裴秀薨癸巳以中護軍王業爲尚書左僕射高陽王珪爲尚書
右僕射孫秀部將何崇帥衆五千人來降夏四月己丑太守董元爲吳
將虞汜所攻軍敗死之北地胡寇金城涼州刺史牽弘討之群虜內叛
圍弘於青山弘軍敗死之五月立皇子憲爲城陽王雍梁秦三州饑赦

其境內殊死以下閏月大雩太官減膳詔交趾三郡南中諸郡無出今年戶調六月詔公卿以下舉將帥各一人辛丑大司馬義陽王望薨大雨霖伊洛河溢流居人四千餘家殺三百餘人有詔振貸給棺秋七月癸酉以車騎將軍賈充爲都督秦涼二州諸軍事吳將陶璜等圍交趾太守楊稷與鬱太守毛晃及日南等三郡降於吳八月景戌以征東大將軍衛瓘爲征北大將軍都督幽州諸軍事景申城陽王憲薨分益州之南中四郡置寧州曲赦四郡殊死以下冬十月丁丑日有蝕之十一月丁巳衛公姬薨十二月大雪罷中領軍并北軍中候以光祿大夫鄭袤爲司空

八年春正月監軍何楨討匈奴劉猛累破之左部帥李恪殺猛而降癸亥帝耕于籍田二月乙亥禁彫文綺組非法之物壬辰太宰安平王孚薨詔內外羣官舉任邊郡者各三人帝與右將軍皇甫陶論事陶與帝爭言散騎常侍鄭徽表請罪之帝曰讜言謇諤所望於左右也人主常以阿媚爲患豈以爭巨爲損哉徽越職妄奏豈朕之意遂免徽官夏四

月置後將軍以備四軍六月益州牙門張弘誣其刺史皇甫晏反殺之傳首京師弘坐伏誅夷三族壬辰大赦景申詔復隴右四郡遇寇害者田租秋七月以車騎將軍賈充爲司空九月吳西陵督步闡來降拜衛將軍開府儀同三司封宜都公吳將陸抗攻闡遣車騎將軍羊祜帥衆出江陵荊州刺史楊肇迎闡於西陵巴東監軍徐胤擊建平以救闡冬十月辛未朔日有蝕之十二月肇攻抗不剋而還闡城陷爲抗所禽九年春正月辛酉司空密陵侯鄭袤薨二月癸巳司徒樂陵公石苞薨立安平亭侯隆爲安平王三月立皇子祗爲東海王夏四月戊辰朔日有蝕之五月早以太保何曾領司徒六月乙未東海王祗薨秋七月丁酉朔日有蝕之吳將魯淑圍弋陽征虜將軍王渾擊敗之罷五官左右中郎將弘訓太僕衛尉大長秋等官鮮卑寇廣寧殺略五千人詔聘公卿以下子女以備六宮采擇未畢權禁斷婚姻冬十月辛巳制女年十七父母不嫁者使長吏配之十一月丁酉臨宣武觀大閱諸軍甲辰乃罷○十年春正月辛亥帝耕籍田閏月癸酉大傳壽光公鄭冲薨己卯高

陽王珪薨庚辰太原王瓌薨丁亥詔曰嫡庶之別所以辨上下明貴賤而近世以來多皆內寵登妃后之職亂尊卑之序自今以後皆不得登用妾媵以爲嫡正二月分幽州五郡置平州三月癸亥日有蝕之夏四月己未太尉臨淮公荀顗薨六月癸巳臨聽訟觀錄囚徒多所原遣是夏大蝗秋七月景寅皇后楊氏崩壬午吳平虜將軍孟泰偏將軍王嗣等帥衆降八月涼州虜寇金城諸郡鎮西將軍汝陰王駿討之斬其帥乞文泥等戊申葬元皇后于峻陽陵九月癸亥以大將軍陳騫爲太尉攻拔吳枳里城獲吳立信校尉莊祐吳將孫遵李承帥衆寇江夏太守嵇喜擊破之立河橋于富平津冬十一月立城東七里澗石橋庚午帝臨宣武觀大閱諸軍十二月有星孛于軫置籍田令立太原王子緝爲高陽王吳威北將軍嚴聰揚威將軍嚴整偏將軍朱買來降是歲鑿陝南山決河東注洛以通運漕

咸寧元年春正月戊午朔大赦改元二月以將士應已娶者多家有五女者給復辛酉以故鄴令夏謨有清稱賜穀百斛以奉祿薄賜公卿以

下帛有差叛虜樹機能送質請降夏五月下邳廣陵大風拔木壞廬舍
六月鮮卑力微遣子來獻吳人寇江夏西域戊巳校尉馬循討叛鮮卑
破之斬其渠帥戊申置太子詹事官秋七月甲申晦日有蝕之郡國螟
八月壬寅沛王子文薨以故太傅鄭冲太尉荀顗司徒石苞司空裴秀
驃騎將軍王沉安平獻王孚等及太保何曾司空賈充太尉陳騫中書
監荀勗南將軍羊祜齊王攸等皆列於銘饗九月甲子青州螟徐州
大水冬十月乙酉常山王殷薨癸巳彭城王權薨十一月癸亥大閱於
宣武觀至于巳巳十二月丁亥追尊宣帝廟曰高祖景帝曰世宗文帝
曰太祖是月大疫洛陽死者大半封裴頠為鉅鹿公

二年春正月以疾疫廢朝賜諸散吏至于士卒絲各有差二月景戌河
間王洪薨甲午赦五歲刑以下東夷八國歸化并州虜犯塞監并州諸
軍事胡奮擊破之初燉煌太守尹璩卒州以燉煌令梁澄領太守事議
郎令狐豐廢澄自領郡事豐死弟宏代之至是涼州刺史楊欣斬宏傳
首洛陽先是帝不豫及瘳群臣上壽詔曰每念頃遇疫氣死亡為之愴

然豈以一身之休息忘百姓之艱邪諸上禮者皆絕之夏五月鎮西大將軍汝陰王駿討北胡斬其渠帥吐敦立國子學庚午大雩六月癸丑薦荔支于太廟甲戌有星孛于氐自春旱至于月始雨吳京下督孫楷帥衆來降以爲車騎將軍封丹楊侯白龍二見于新興井中秋七月有星孛于大角吳臨平湖自漢末壅塞至是自開父老相傳云此湖塞天下亂此湖開天下平癸丑安平王隆薨東夷十七國內附河南魏郡暴水殺百餘人詔給棺槨鮮卑阿羅多等寇邊西域戍已校尉馬循討之斬首四千餘級獲生九千餘人於是來降八月庚辰河東平陽地震己亥以太保何曾爲太傅太尉陳騫爲大司馬司空賈充爲太尉鎮軍大將軍齊王攸爲司空有星孛于太微九月又孛于翼丁未起太倉於城東常平倉於東西市閏月荊州五郡水流四千餘家冬十月以汝陰王駿爲征西大將軍平南將軍羊祜爲征南大將軍丁卯立皇后楊氏大赦賜王公以下及于鰥寡各有差十一月白龍二見于梁國十二月徵虓士安定皇甫謐爲太子中庶子封石父鎮軍將軍楊駿爲臨晉侯是

月以平州刺史傳詢前廣平太守孟桓清白有聞詢賜帛二百匹桓百匹
○三年春正月景子朔日有蝕之立皇子裕為始平王安平穆王隆弟敦
為安平王詔曰宗室戚屬國之枝葉欲令奉率德義為天下式然處富
貴而能慎行者寡召穆公糾合兄弟而賦棠棣之詩此姬氏所以本枝
百世也今以衛將軍扶風王亮為宗師所當施行皆諮之於宗師也庚
寅始平王裕薨有星孛于西方使征北大將軍衛瓘討鮮卑力微三月
平虜護軍文淑討叛虜樹機能等並破之有星孛于胃乙未帝將射雉
慮損麥苗而止夏五月戊子吳將邵凱夏詳帥眾七千餘人來降六月
益梁八郡水殺三百餘人沒邸閣別倉秋七月以都督豫州諸軍事王
渾為都督揚州諸軍事中山王睦以罪廢為丹水侯八月癸亥徙扶風
王亮為汝南王東莞王仲為琅邪王汝陰王駿為扶風王琅邪王倫為
趙王渤海王輔為太原王太原王顥為河間王北海王陵為任城王陳
王斌為西河王汝南王東為南陽王濟南王眈為中山王河間王威為
章武王立皇子瑋為始平王允為濮陽王該為新都王遐為清河王鉅

平侯羊祜爲南城侯以汝南王亮爲鎮南大將軍大風拔樹暴寒且冰
郡國五隕霜傷穀九月戊子以左將軍胡奮爲都督江北諸軍事兗豫
徐青荆益梁七州大水傷秋稼詔振給之立齊王子蕤爲遼東王贊爲
廣漢王冬十一月景戌帝臨宣武觀大閱至于壬辰十二月吳將孫慎
入江夏汝南略千餘家而去是歲西北雜虜及鮮卑匈奴五溪蠻夷東
夷三國前後十餘輩各帥種人部落內附

四年春正月庚午朔日有蝕之三月甲申尚書左僕射盧欽卒辛酉以
尚書右僕射山濤爲尚書左僕射東夷六國來獻夏四月蚩尤旗見於
東井六月丁未陰平廣武地震甲子又震涼州刺史楊欣與虜若羅拔
能等戰于武威敗績死之弘訓皇后羊氏崩秋七月己丑祔葬景獻皇
后羊氏于峻平陵庚寅高陽王緝薨癸巳范陽王綏薨荆揚郡國二十
皆大水九月以太傅何曾爲太宰辛巳以尚書令李胤爲司徒冬十月
以征北大將軍衛瓘爲尚書令揚州刺史應綽伐吳皖城斬首五千級
焚穀米百八十萬斛十一月辛巳太醫司馬程據獻雉頭裘帝以奇

技異服典禮所禁焚之于殿前甲申勅内外敢有犯者罪之吳昭武將軍劉翽厲武將軍祖始來降辛卯以尚書杜預都督荊州諸軍事征南大將軍羊祜卒十二月乙未西河王斌薨丁未太宰郎陵公何曾薨是歲東夷九國內附

五年春正月虜帥樹機能攻陷涼州乙丑使討虜護軍武威太守馬隆擊之二月甲午白麟見于平原三月匈奴都督拔奔虛帥部落歸化乙亥以百姓饑饉減御膳之半有星孛于柳夏四月又孛于女御大赦降除部曲督以下質任丁亥郡國八雨雹傷秋稼壞百姓廬舍秋七月有星孛于紫宮九月甲午麟見于河南冬十月戊寅匈奴餘渠都督獨雍等帥部落歸化汲郡人不準掘魏襄王冢得竹簡小篆古書十餘萬言藏于祕府十月大舉伐吳遣鎮軍將軍琅邪王伋出涂中安東將軍王渾出江西建威將軍王戎出武昌平西將軍胡奮出夏口鎮南大將軍杜預出江陵龍驤將軍王濬廣武將軍唐彬率巴蜀之卒浮江而下東西凡二十餘萬以太尉賈充爲大都督行冠軍將軍楊濟爲副惣統

衆軍十二月馬隆擊叛虜樹機能大破斬之涼州平肅慎來獻楛矢石砮
○太康元年春正月己丑朔五色氣冠日癸丑王渾劾吳尋陽賴鄉諸
城獲吳武威將軍周興二月戊午王濬唐彬等劾丹陽城庚申又劾西
陵殺西陵都督鎮軍將軍留憲征南將軍成瑨西陵監鄭廣壬戌濬
又劾夷道樂鄉城殺夷道監陸晏水軍都督陸景甲戌杜預劾江陵斬
吳江陵督五延平南將軍胡奮劾江安於是諸軍並進樂鄉荆門諸戍
相次來降乙亥以濬爲都督益梁二州諸軍事復下詔曰濬彬東下埽
除巴丘與胡奮王戎共平夏口武昌順流長騶直造秣陵與奮戎審量
其宜杜預當鎮靜零桂懷輯衡陽大兵旣過荊州南境固當傳檄而定
預當分萬人給濬七千給彬夏口旣平奮宜以七千人給濬武昌旣了
戎當以六千人增彬太尉充移屯項揔督諸方濬進破夏口武昌遂泛
舟東下所至皆平王渾周浚與吳丞相張悌戰于版橋大敗之斬悌及
其將孫震沈瑩傳首洛陽孫皓窮蹙請降送璽綬於琅邪王使三月壬
申王濬以舟師至于建鄴之石頭孫皓大懼面縛輿櫬降于軍門濬杖

節解縛焚櫬送于京都收其圖籍剋州四郡四十三縣三百一十三戶
五十二萬三千吏三萬二千兵二十三萬男女口二百三十萬其牧守
已下皆因吳所置除其苛政示之簡易吳人大悅乙酉大赦改元大酺
五日恤孤老困窮夏四月河東高平雨雹傷秋稼遣兼侍中張側黃
門侍郎朱震分使揚越慰其初附白麟見于頓丘三河魏郡弘農雨雹
傷粟麥五月辛亥封孫皓為歸命侯拜其太子為中郎諸子為郎中吳
之舊望隨才擢敘孫氏大將戰亡之家徙於壽陽將吏渡江復十年百
姓及百工復二十年景寅帝臨軒大會引皓升殿群臣咸稱萬歲丁卯
薦酈詠酒于太廟郡國大電傷秋稼庚午詔諸士卒年六十以上罷歸
于家庚辰以王濬為輔國大將軍襄陽侯杜預當陽侯王戎安豐侯唐
彬上庸侯賈充琅邪王伷以下增封於是論功行封賜公卿以下帛各
有差六月丁丑初置翊軍校尉官封丹水侯睦為高陽王甲申東夷十
國歸化秋七月虜軻成泥寇西平浩疊殺督將以下三百餘人東夷二十
國獻庚寅以尚書魏舒為尚書右僕射八月車師前部遣子入侍己未

封皇弟延祚為樂平王白龍二見于永昌九月群臣以天下一統屢請封禪帝謙讓弗許冬十月丁巳除五女復十二月戊辰廣漢王贊薨二年春二月淮南丹楊地震三月景申安平王敦薨賜王公以下吳生口各有差詔選孫皓妓妾五千人入宮東夷五國朝獻夏六月東夷五國內附郡國十六雨雹大風拔樹壞百姓廬舍江夏泰山水流居人三百餘家秋七月上黨又暴風雨雹傷秋稼八月有星孛于張冬十月鮮卑慕容廆寇昌黎十月壬寅大司馬陳騫薨有星孛于軒轅鮮卑寇遼西平州刺史鮮于嬰討破之

三年春正月丁丑罷秦州并雍州甲午以尚書張華都督幽州諸軍事三月安北將軍嚴詢敗鮮卑慕容廆於昌黎殺傷數萬人夏四月庚午太尉魯公賈充薨閏月景子司徒廣陸侯李胤薨癸丑白龍二見于濟南秋七月罷平州寧州刺史三年一入奏事九月東夷二十九國歸化獻其方物吳故將莞恭帛奉舉兵反攻害建鄴令遂圍揚州徐州刺史嵇喜討平之冬十二月甲申以司空齊王攸為大司馬督青州諸軍

事鎮東大將軍琅邪王伋為撫軍大將軍汝南王亮為太尉光祿大夫
山濤為司徒尚書令衛瓘為司空景申詔四方水旱甚者無出田租
四年春正月甲申以尚書右僕射魏舒為尚書左僕射下邳王晃為尚
書右僕射戊午司徒山濤薨二月己丑立長樂亭侯寔為北海王三月
辛丑朔日有蝕之癸丑大司馬齊王攸薨夏四月任城王陵薨五月己
亥大將軍琅邪王伋薨徙遼東王粲為東萊王六月增九卿禮秩牂柯
獠二千餘落內屬秋七月壬子以尚書右僕射下邳王晃為都督青州
諸軍事景寅兖州大水復其田租八月鄯善國遣子入侍假其歸義侯
以隴西王泰為尚書右僕射冬十一月戊午新都王該薨以尚書左僕
射魏舒為司徒十二月庚午大閱于宣武觀是歲河南及荊州揚州忝
○五年春正月己亥青龍二見于武庫井中二月景寅立南宮王子珽
為長樂王壬辰地震夏四月任城魯國池水赤如血五月景午宣帝廟
梁折六月初置黃沙獄秋七月戊申皇子恢薨任城梁國中山雨雹傷
秋稼減天下戶課三分之一九月南安大風折木郡國五大水隕霜傷

秋稼冬十一月甲辰太原王輔薨十二月庚午大赦林邑大秦國各遣使來獻閏月鎮南大將軍當陽侯杜預卒

六年春正月庚申朔以比歲不登免租貸宿負戊辰以征南大將軍王渾爲尚書左僕射尚書褚詵都督揚州諸軍事楊濟都督荊州諸軍事三月郡國六陷霜傷桑麥夏四月扶南等十國來獻參離四千餘落內附郡國四旱十大水壞百姓廬舍秋七月巴西地震八月景戌朔日有蝕之減百姓絲絹三分之一白龍見于京兆以鎮軍大將軍王濬爲撫軍大將軍九月景子山陽公劉康薨冬十月南安山崩水出南陽郡獲兩足獸龜茲焉耆國遣子入侍十二月甲申大閱于宣武觀旬日而罷庚子撫軍大將軍襄陽侯王濬卒

七年春正月甲寅朔日有蝕之乙卯詔曰比年災異屢發日蝕三朝地震山崩邦之不臧實在朕躬公卿大臣各上封事極言其故勿有所諱夏五月郡國十三旱鮮卑慕容廆寇遼東秋七月朱提山崩犍爲地震八月東夷十一國內附京北地震九月戊寅驃騎大將軍扶風王駿薨

郡國八大水冬十一月壬子以隴西王泰都督關中諸軍事十二月遣侍御史巡遭水諸郡出後官才人妓女以下二百七十人歸于家始制大臣聽終喪三年己亥河陰雨赤雪三頃是歲扶南等二十一國馬韓等十一國遣使來獻

八年春正月戊申朔日有蝕之太廟殿陷三月乙丑臨商觀震夏四月齊國大水隕霜傷麥六月魯國大風拔樹木壞百姓廬舍郡國八大水秋七月前殿地陷深數丈中有破船分東夷二國內附九月改營太廟冬十月南康平固縣吏李豐反聚衆攻郡縣自號將軍十一月海安令蕭輔聚衆反十二月吳興人蔣迪聚黨反圍陽羨縣州郡捕討皆伏誅南夷扶南西域康居國各遣使來獻是歲郡國五地震

九年春正月壬申朔日有蝕之詔曰興化之本由政平訟理也二千石長吏不能勤恤人隱而輕挾私故興長刑獄又多貪負濁煩撓百姓其勅刺史二千石糾其穢濁舉其公清有司議其黜陟令內外群官舉清能拔寒素江東四郡地震二月尚書右僕射陽夏侯胡奮卒以尚書朱整

爲尚書右僕射三月丁丑皇后親桑于西郊賜帛各有差壬辰初并二社爲一夏四月江南郡國八地震隕霜傷粟麥五月義陽王奇有罪黜爲三縱亭侯詔內外群官舉守令之才六月庚子朔日有蝕之徙章武王威爲義陽王郡國三十二大旱傷麥秋八月壬子星隕如雨詔郡國五歲刑以下決遣無留庶獄九月東夷七國詣校尉內附郡國二十四蠲冬十二月癸卯立河間平王洪子英爲章武王戊申青龍黃龍各一見于魯國

十年夏四月以京兆太守劉霄陽平太守梁柳有政績各賜穀千斛郡國八隕霜太廟成乙巳遷神主于新廟帝迎于道左遂祫祭大赦文武增位一等作廟者二等丁未尚書右僕射廣興侯朱整卒癸丑崇賢殿災五月鮮卑慕容廆來降東夷十二國內附六月庚子山陽公劉瑾薨復置二社冬十月壬子徙南宮王承爲武邑王十一月景辰守尚書令左光祿大夫荀勗卒帝疾瘳賜王公以下帛有差含章殿鞠室火甲申以汝南王亮爲大司馬大都督假黃鉞改封南陽王東爲秦主始平王

瑋爲楚王濮陽王允爲淮南王並假節之國各統方州軍事立皇太子
又爲長沙王穎爲成都王晏爲吳王熾爲豫章王演爲代王皇孫通爲
廣陵王立濮陽王子迪爲漢王始平王子儀爲毗陵王汝南王次子羨永
爲西陽公徙扶風王暢爲順陽王暢弟歆爲新野公琅邪王觀弟澹爲
東武公繇爲東安公湛爲廣陵公卷爲東莞公改諸王國相爲內史十
二月庚寅太廟梁折是歲東夷絕遠三十餘國西南夷二十餘國來獻
虜王戊奚軻男女十萬口來降

太熙元年春正月辛酉朔改元己巳以尚書左僕射王渾爲司徒司空
衛瓘爲太保二月辛丑東夷七國朝貢琅邪王觀薨三月甲子以右光
祿大夫石鑒爲司空夏四月辛丑以侍中車騎將軍楊駿爲太尉都督
中外諸軍錄尚書事己酉帝崩于含章殿時年五十五葬峻陽陵廟號世祖
○帝字量弘厚造次必於仁恕容納謹正未嘗失色於人明達善謀能
斷大事故得撫寧萬國綏靜四方承魏氏奢侈刻弊之後百姓思古之
遺風乃厲以恭儉敦以寡慾有司嘗奏御牛青絲紉斷詔以青麻代之

臨朝寬裕法度有恒高陽許允既爲文帝所殺允子奇爲太常丞帝將有事於太廟朝議以奇受害之門不欲接近左右請出爲長吏帝乃追述允夙望稱奇之才擢爲祠部郎時論稱其夷曠平吳之後天下乂安遂怠於政術耽於遊宴寵愛后黨親貴當權舊臣不得專任尋章奏廢請謁行矣爰至末年知惠帝弗克負荷然恃皇孫聰睿故無廢立之心復慮非賈后所生終致危敗遂腹心共圖後事說者紛然久而不定竟用王祐之謀遣太子母弟秦王東都督關中楚王瑋淮南王允並鎮守要害以彊帝室又恐楊氏之偪復以佑爲北軍中候以典禁兵旣而寢疾彌留至于大漸佐命元勳皆已先沒群臣惶惑計無所從會帝小差有詔以汝南王亮輔政又欲令朝士之有名望年少者數人佐之楊駿秘而不宣帝復尋至迷亂楊后輒以爲詔以駿輔政促亮進發帝尋小問問汝南王來未意欲見之有所付託左右荅言未至帝遂困篤中朝之亂實始于斯矣

制曰武皇承基誕膺天命握圖御宇敷化導民以供代勞以治易亂絕

練綸之貢去雕琢之飾制奢侈以變儉約止澆風而反淳朴雅好直言
留心采擢劉毅裴楷以質直見容秘紹許奇雖仇讎不棄仁以御物寬
而得衆宏略大度有帝王之量焉於時民和俗靜家給人足聿脩武用
思啓封疆決神筭於深衷斷雄圖於議表馬隆西伐王濬南征師不延
時撫虜削迹兵無血刃揚越爲墟通上代之不通服前王之未服禎祥
顯應風教肅清天人之功成矣霸王之業大矣雖登黜之禮讓而不爲
驕泰之心因斯以起見土地之廣謂萬葉而無虞覩天下之安謂千年
而永治不知處廣以思狹則廣可長廣居治而忘危則治無常治加之
建立非所委寄失才志欲就於升平行先迎於禍亂是猶將適越者指
沙漠以遵途欲登山者涉舟航而覓路所趣途遠所尚轉難南北倍殊
高下相反求其至也不亦難乎況以新習易動之基而無久安難拔之
慮故賈充凶豎懷姦志以擁權楊駿豺狼苞禍心以專輔及乎宮車晚
出諒闇未周藩翰變親以成踈連丘競滅其本棟梁回忠而起僞擁衆
各舉其威曾未數年綱紀大亂海內版蕩宗廟播遷帝道王猷反居文

身之俗神州赤縣翻成被髮之鄉棄所大以資人掩其小而自託爲天下笑其故何哉良由失慎於前所以貽患於後且知子者賢父知臣者明君子不肖則家亡臣不忠則國亂國亂不可以安也家亡不可以全也是以君子防其始聖人閉其端而祖惑荀勗之姦謀迷王渾之僞策心屢移於衆口事不定於己圖元海當除而不除卒令擾亂區夏惠帝可廢而不廢終使傾覆洪基全一人者德之輕拯天下者功之重棄一子者忍之小安社稷者孝之大況乎資三世而成業延三孽以喪之所謂取輕德而捨重功畏小忍而忘大孝聖賢之道豈若斯乎雖則善始於初而乖令終於末所以殷勤史策不能無慷慨焉

晉書帝紀卷第三

帝紀卷第四

晉書四

御撰

惠帝

孝惠皇帝諱衷字正度武帝第二子也泰始三年立為皇太子時年九歲大熙元年四月己酉武帝崩是日皇太子即皇帝位大赦改元為永熙尊皇后楊氏曰皇太后立妃賈氏為皇后夏五月辛未葬武帝於峻陽陵景子增天下位一等預喪事者二等復租調一年二千石已上皆封關中侯以太尉楊駿為大傅輔政秋八月壬午立廣陵王遹為皇太子以中書監何劭為太子太師吏部尚書王戎為太子太傅衛將軍楊濟為太子太保遣南中郎將石崇射聲校尉胡奔長水校尉趙俊楊烈將軍趙歡將屯兵四出冬十月辛酉以司空石鑒為太尉前鎮西將軍隴西王泰為司空

永平元年春正月乙酉朔臨朝不設樂詔曰朕夙遭不造淹恤在疚賴祖宗遺靈宰輔忠賢得以眇身託于群后之上昧於大道不明于訓戰戰兢兢夕惕若厲乃者哀迷之際三事股肱惟社稷之重率遵翼室之典

猶欲長奉先皇之制是以有永熙之號然日月踰邁已涉新年開元易紀禮之舊章其改永熙三年為永平元年又詔子弟及群官並不得謁陵景牛皇太子冠丁未見于太廟二月甲寅賜王公已下帛各有差癸酉鎮南將軍楚王瑋鎮東將軍淮南王允來朝戊寅復置祕書監官三月辛卯誅太傅楊駿駿弟衛將軍瑤太子太保濟中護軍張劭散騎常侍段廣楊邈左將軍劉預河南尹李斌中書令蔣俊東夷校尉文叔尚書武茂皆夷三族壬辰大赦改元賈后矯詔廢皇太后為廢人徙于金墉城告于天地宗廟誅太后母龐氏壬寅徵大司馬汝南王亮為太宰與太保衛瓘輔政以秦王東為大將軍東平王楙為撫軍大將軍鎮南將軍楚王瑋為衛將軍領北軍中候下邳王亮為尚書令東安公繇為尚書左僕射進封東安王督將侯者千八十一人庚戌免東安王繇及東平王楙繇徙帶方夏四月癸亥以征東將軍梁王彤為征西大將軍都督關西諸軍事太子少傅阮坦為平東將軍監青徐二州諸軍事己以太子太傅王戎為尚書右僕射五月甲戌毗陵王軌薨壬午除天

下戶調縣絹賜孝悌高年鰥寡力田者帛人三匹六月賈后矯詔使楚王瑋殺太宰汝南王亮太保菑陽公衛瓘乙丑以瑋擅害亮瓘殺之曲赦洛陽以廣陵王師劉寔為太子太保司空隴西王泰錄尚書事秋七月分揚州荊州十郡為江州八月庚申以趙王倫為征東將軍都督徐州兖二州諸軍事河間王顥為北中郎將鎮鄴太子太師何劭為都督豫州諸軍事鎮許昌徙長沙王乂為常山王已巳進西陽公羨爵為王辛未立隴西世子越為東海王九月甲午大將軍秦王東薨辛丑徵征西大將軍梁王彤為衛將軍錄尚書事以趙王倫為征西大將軍都督雍梁二州諸軍事冬十二月辛酉京師地震是歲東夷十七國南夷二十四部並詣校尉內附

二年春二月己酉賈后弒皇太后于金墉城秋八月壬子大赦九月乙酉中山王耽薨冬十一月大疫是歲沛國雨雹傷麥

三年夏四月滎陽雨雹六月弘農郡雨雹深三尺冬十月太原王泓薨○四年春正月丁酉朔侍中太尉安昌公石鑒薨夏五月蜀郡山移淮南

壽春洪水出山崩地陷壞城府及百姓廬舍匈奴郝散反攻上黨殺長吏六月壽春地大震死者二十餘家上庸郡山崩殺二十餘人秋八月郝散帥衆降馮翊都尉殺之上谷居庸上庸並地陷裂水泉涌出又有死者大饑九月景辰赦諸州之遭地災者甲午枉矢東北竟天是歲京師及郡國八地震

五年夏四月彗星見于西方李于奎至軒轅六月金城地震東海雨雹深五寸秋七月下邳暴風壞廬舍九月鴈門新興太原上黨大風傷禾稼冬十月武庫火焚累代之寶十二月景戌新作武庫大調兵器丹楊雨雹有石生于京師且年里是歲荆揚兗豫青徐等六州大水詔遣御史巡行振貸

六年春正月大赦司空下邳王晃薨以中書監張華為司空太尉隴西王泰為尚書令衛將軍梁王彤為太子太保丁丑地震三月東海隕霜傷桑麥彭城呂縣有流血東西百餘步夏四月大風五月荆揚二州大水匈奴郝散弟度元帥馮翊北地馬蘭羌盧水胡反攻北地太守張損

死之馮翊太守歐陽建與度元戰建敗績徵征西大將軍趙王倫爲車騎將軍以太子太保梁王彤爲征西大將軍都督雍梁二州諸軍事鎮關中秋分雍州刺史斛紇又爲度元所破秦雍氐羌悉叛推氏帥齊萬年僭號稱帝圍涇陽冬十月乙未曲赦雍涼二州十月景子遣安西將軍夏侯俊建威將軍周處等討萬年梁王彤屯好時關中饑大疫七年春正月癸丑周處及齊萬年戰於六陌王師敗績處死之夏五月魚固雨雹秋七月雍梁州疫大旱隕霜殺秋稼關中饑米斛萬錢詔骨肉相賣者不禁丁丑司徒京陵公主渾薨九月以尚書右僕射王戎爲司徒太子太師何劭爲尚書左僕射

八年春正月景辰地震詔發倉廩賑雍州饑人三月壬戌大赦夏五月郊禱石破二秋九月荆豫揚徐異等五州大水雍州有年

九年春正月左積弩將軍孟觀伐氐戰于中亭大破之獲齊萬年徵西大將軍梁王彤錄尚書事以北中郎將河間王顥爲鎮西將軍鎮關中城都王穎爲鎮北大將軍鎮鄴夏四月鄴人張承基等妖言署置聚黨

數千郡縣逮捕皆伏誅六月戊戌太尉隴西王泰薨秋八月以尚書裴
頤為尚書僕射冬十一月甲子朔日有食之京師大風發屋折木十
二月壬戌廢皇太子適為庶人及其子幽于金墉城殺太子母謝氏
○永康元年春正月癸亥朔大赦改元己卯日有蝕之景子皇孫霖卒
二月丁酉大風飛沙拔木三月尉氏雨血妖星見于南方癸未賈后矯
詔害庶人適于許昌夏四月辛卯日有蝕之癸巳梁王彤趙王倫矯詔
廢賈后為庶人司空張華尚書僕射裴頤皆遇害侍中賈謏及黨與數
十人皆伏誅甲午倫矯詔大赦自為相國都督中外諸軍如宣文輔魏
故事追復故皇太子位丁酉以梁王彤為太宰左光祿大夫何劭為司
徒右光祿大夫劉寔為司空淮南王允為驃騎將軍己亥趙王倫矯詔
害賈庶人于金墉城五月己巳立皇孫臧為皇太孫尚為襄陽王六月
壬寅葬愍懷太子于顯平陵撫軍將軍清河王遐薨癸卯震崇陽陵標
秋八月淮南王允舉兵討趙王倫不克允及其子秦王郁漢王迪皆
遇害曲赦洛陽平東將軍彭城王植薨改封吳王晏為賓徒縣王以

齊王囹爲東平將軍鎮許昌光祿大夫陳準爲太尉錄尚書事九月改
司徒爲丞相以梁王彤爲之冬十月黃霧四塞十月戊午大風飛沙
石六日乃止甲子立皇后羊氏大赦大酺三日十二月彗星見于東方
益州刺史趙欽與洛陽流人李庠害成都內史耿勝健爲太守李宓殺
山太守霍固西夷校尉陳懿據成都反

永寧元年春正月乙丑趙王倫篡帝位景寅遷帝于金墉城號曰太上
皇改金墉曰永昌宮廢皇太孫祗爲濮陽王五星經天縱橫無常癸酉
倫害濮陽王祗略陽流人李特殺趙廞傳首京師三月平東將軍齊王
囹起兵以討倫傳檄州郡屯于陽翟征北大將軍成都王穎征西大將
軍河間王顥常山王又豫州刺史李毅兗州刺史王彥南中郎將新野
公歆皆舉兵應之衆數十萬倫遣其將閭和出伊闕張泓孫輔出堽坂
以距囹孫會士猗許超出黃橋以距穎及穎將趙驤石超戰於淝水會
等大敗棄軍走閏月景戌朔日有蝕食之夏四月歲星書見囹將何勗
盧播擊張泓於陽翟大破之斬孫輔等辛酉左衛將軍王興與尚書准

陵王濯勒兵入宮擒倫黨孫秀孫會許超士猗駱休等皆斬之遂倫歸第即日乘輿反正群臣頓首謝罪帝曰非諸卿之過也癸亥詔曰朕以不德纂承皇統遠不能光濟大業靖綏四方近不能開明刑威式遏姦宄至使逆臣孫秀敢肆凶虐窺間王室遂奉趙王倫號餐據天位鎮東大將軍齊王囧征北大將軍成都王穎征西大將軍河間王顥並以明德茂親忠規允著首建大策匡救國難尚書崔共立大謀左衛將軍王輿與群公卿士協同謀略親勒本營斬秀及其子前趙王倫為秀所誤與其子等已詣金墉迎朕幽宮旋軫閭闔豈在余一人獨饗其慶宗廟社稷實有賴焉於是大赦改元孤寡賜穀五斛大酺五日誅趙王倫義陽王威九門侯質等及倫之黨與五月立襄陽王尚為皇太孫六月戊辰大赦增吏位二等復封賓徒王晏為吳王庚午東萊王蕤左衛將軍王輿謀廢齊王囧事泄蕤廢為庶人輿伏誅夷三族甲戌以齊王囧為大司馬都督中外諸軍事成都王穎為大將軍錄尚書事河間王顥為太尉罷丞相復置司徒官己卯以梁王彤為太宰領司徒封齊王囧

功臣葛旆奉平公路季小黃公衛毅平陰公劉眞安鄉公韓泰封丘公
秋七月甲午立吳王晏子國爲漢王復封常山王乂爲長沙王八月大
赦戊辰原徙邊者益州刺史羅尚討羌破之己巳徙南平王祥爲宜都
王下邳王韓薨以東平王懋爲平東將軍都督徐州諸軍事九月追東
安王繇復其爵丁丑封楚王瑋子範爲襄陽王冬十月流人李特反於
蜀十二月司空何劭薨封齊王囧子冰爲樂安王英爲濟陽王超爲淮
南王是歲郡國十二旱六蝗

太安元年春正月庚子安東將軍譙王隨薨二月癸卯赦司隰兖豫四
州皇太孫尚薨夏四月彗星晝見五月乙酉侍中太宰領司徒梁王彤
薨以右光祿大夫劉寔爲太傅太尉河間王顥遣將衙博擊李特於蜀
爲特所敗特遂陷梓潼巴西害廣漢太守張微自號大將軍癸卯以清
河王遐子覃爲皇太子賜孤寡帛大酺五日以齊王囧爲太師東海王
越爲司空秋七月兖豫徐兗等四州大水冬十月地震十二月丁卯河
間王顥表齊王囧窺伺神器有無君之心與成都王穎新野王歆范陽

王虓同會洛陽請廢固還第長沙王又奉乘輿屯南止車門攻固殺之
幽其諸子于金墉城廢固弟北海王亮大赦改元以長沙王又爲太尉
都督中外諸軍事封東萊侯麤子炤爲齊王

二年春正月甲子朔赦五歲刑三月李特攻陷益州荊州刺史宋岱擊
特斬之傳首京師夏四月特子雄復據益州五月義陽蠻張昌舉兵反
以山都人丘沉爲主改姓劉氏僞號漢建元神鳳攻破郡縣南陽太守
劉彬平南將軍羊伊鎮南大將軍新野王歆並遇害六月遣荊州刺史
劉弘等討張昌于方城王師敗績秋七月中書令卞粹侍中馮蓀河南
尹李含等貳於長沙王又疑而害之張昌陷江南諸郡武陵太守賈
隆零陵太守孔紘豫章太守閻濟武昌太守劉根皆遇害昌別帥石冰
寇揚州刺史陳徽與戰大敗諸郡盡沒臨淮人封雲舉兵應之自阜陵
寇徐州八月河間王顥成都王穎舉兵討長沙王又帝以又爲大都督帥
軍禦之庚申劉弘及張昌戰於清水斬之顥遣其將張方穎遣其將陸
機牽秀石超等來逼京師乙丑帝幸十三里橋遣將軍皇甫商距方於

宜陽己巳帝旋軍于宣武場庚午舍于石樓天中裂無雲而雷九月丁丑
帝次于河橋壬午皇甫商爲張方所敗甲申帝軍于芒山丁亥幸偃師
辛卯舍于豆田癸巳尚書右僕射與晉侯羊玄之卒帝旋于城東景申
進軍緱氏擊李牽秀走之大赦張方入京城燒清明開陽二門死者萬計
石超逼乘輿于緱氏冬十一月壬寅帝旋于宮石超焚緱氏服御無遺
丁未破牽秀范陽王虓于東陽門外戊申破陸機于建春門石超斬其
大將軍賈崇等十六人懸首銅駝街張方退屯十三里橋十月辛巳
星晝隕聲如雷王師攻方壘不利方決千金竭水碓皆涸乃發王公奴
婢手舂給兵廩二品已下不從征者男子十三以上皆從役又發奴助
兵號爲四部司馬公私窮蹙米石萬錢詔命所至一城而已壬寅夜赤
氣竟天隱隱有聲景辰地震癸亥東海王越執長沙王乂幽於金墉城
尋爲張方所害甲子大赦景寅揚州秀才周玘前南平內史王矩前吳
興內史顧秘起義軍以討石永水退自臨淮趣壽陽征東將軍劉準遣
廣陵度支陳敏擊水李雄自郾城攻益州刺史羅尚尚委城而遁雄盡

有成都之地封鮮卑段勿塵為遼西公

永興元年春正月景午尚書令樂廣卒成都王穎自鄴諷于帝乃大赦
改元為永安帝逼于河間王顥密詔雍州刺史劉沉秦州刺史皇甫重
以討之沉舉兵攻長安為顥所敗張方大掠洛中還長安於是軍中大
饑人相食以成都王穎為丞相穎遣從事中郎成勳等以兵五萬屯十
二城門殿中宿所忌者穎皆殺之以三部兵代宿衛二月乙酉廢皇后
羊氏幽于金墉城黜皇太子曹芳復為清河王三月陳敏攻石冰斬之揚
徐二州平河間王顥表請立成都王穎為太弟戊申詔曰朕以不德纂
承鴻緒于茲十有五載禍亂滔天茲逆仍起至乃幽廢重宮宗廟圯絕
成都王穎溫仁惠和剋平暴亂其以穎為皇太弟都督中外諸軍事丞
相如故大赦賜鰥寡高年帛三匹大酺五日景辰盜竊太廟服器以太
尉顥為太宰太傅劉寔為太尉六月新作三城門秋七月景申朔右衛將
軍陳眕以詔召百寮入殿中因勒兵討成都王穎戊戌大赦復皇后羊
氏及皇太子曹芳己亥司徒王戎東海王越高密王簡平昌公模吳王晏

豫章王熾襄陽王範右僕射荀藩等奉帝北征至安陽衆十餘萬穎遣其將石超距戰己未六軍敗績于蕩陰矢及乘輿百官分散侍中嵇紹死之帝傷頰中二矢亡六爾帝遂幸超軍餒其超進水左右奉秋桃超遣弟熙奉帝之鄴穎帥群官迎謁道左帝下輿涕泣其夕幸于穎軍穎府有九錫之儀陳留王送貂蟬文衣鷄尾明日乃備法駕幸于鄴唯豫章王熾司徒王戎僕射荀藩從庚申大赦改元爲建武八月戊辰穎殺東安王繇張方復入洛陽廢皇后羊氏及皇太子曹芳奴左賢王劉元海反於離石自號大單于安北將軍王浚遣烏丸騎攻成都王穎于鄴大敗之穎與帝單車走洛陽服御分散倉卒上下無齋侍中黃門被囊中齎私錢三千詔貸用所在買飯以供宮人止食於道中客舍宮人有持升餘粒米飯及燥蒜鹽豉以進帝帝噉之御中黃門布被次獲嘉帝麤米飯盛以瓦盆帝噉兩盂有老父獻蒸雞帝受之至溫將謁陵帝喪履納從者之履下拜流涕左右皆歔歔及濟河張方帥騎三千以陽燧青蓋車奏迎方拜謁帝躬止之辛巳大赦賞從者各有差冬十一月乙

未方請帝謁廟因劫帝幸長安方以所乘車入殿中帝馳避後園竹中
方逼帝升車左右中黃門鼓吹十二人步從唯中書監慮志侍側方以
帝幸其壘帝令方具車載宮人寶物軍人因妻略後宮分爭府藏魏晉
已來之積掃地無遺矣行次新安寒甚帝墮馬傷足尚書高光進面衣
帝嘉之河間王顥帥官屬步騎三萬迎于霸上顥前拜謁帝下車止之
以征西府爲宮唯僕射荀藩司隸劉暉太常鄭球河南尹周馥與其遺
官在洛陽爲留臺承制行事號爲東西臺焉景平留臺大赦改元復爲
永安辛丑復皇后羊氏李雄僭號成都王劉元海僭號漢王十二月丁
亥詔曰天禍晉邦冢嗣莫繼成都王穎自在儲貳政績虧損四海失望
不可承重其以王還第豫章王熾先帝愛子令問日新四海注意今以
爲皇太弟以隆我晉邦以司空越爲太傅與太宰顥夾輔朕躬司徒王
戎參錄朝政光祿大夫王衍爲尚書左僕射安南將軍虓安北將軍濬
平北將軍騰各守本鎮高密王簡爲鎮南將軍領司隸校尉權鎮洛陽
東中郎將模爲寧北將軍都督冀州鎮于鄴鎮南大將軍劉弘領荊州

以鎮南上周馥繆胤各還本部百官皆復職齊王固前應還第長沙王又輕陷重刑封其子紹為樂平縣王以奉其嗣自頃戎車屢征勞費人力供御之物皆減三分之二戶調田租三分減一蠲除苛政受人務本清通之後當還東京大赦改元以河間王顥都督中外諸軍事

二年春正月甲午朔帝在長安夏四月詔封樂平王紹為齊王景子張方廢皇后羊氏六月甲子侍中司徒安豐侯王戎薨隴西太守韓稚攻秦州刺史張輔殺之李雄僭即帝位國號蜀秋七月甲午尚書諸曹火燒崇禮闕東海王越嚴兵徐方將西迎大駕成都王穎部將公師藩等聚衆攻陷郡縣害陽平太守李志汲郡太守張延等轉攻鄴平昌公模遣將軍趙驤擊破之八月辛丑大赦驃騎將軍范陽王虓逐冀州刺史李義揚州刺史曹武殺丹楊太守朱建李雄遣其將李驤寇漢安車騎大將軍劉弘逐平南將軍彭城王釋于宛九月庚寅朔公師藩又害平原太守王景清河太守馮熊庾子豫州刺史劉喬攻范陽王虓於許昌敗之王子以成都王穎為鎮軍大將軍都督河北諸軍事鎮鄴河間王

顯遣將軍呂朗屯洛陽冬十月景子詔曰得豫州刺史劉喬檄稱潁川太守劉輿迫脅驃騎將軍虓距逆詔令造構凶逆擅劫郡縣合聚兵衆擅用荀晞為兖州斷截王命鎮南大將軍荊州刺史劉弘平南將軍彭城王釋等其各勒所統徑會許昌與喬并力今遣右將軍張方為大都督統精卒十萬建武將軍呂朗廣武將軍蹇胤建威將軍刁默等為軍前鋒共會許昌除輿兄弟丁丑使前車騎將軍石超北中郎將王闡討輿等赤氣見于北方東西竟天有星孛于北斗平昌公模遣將軍宋胄等屯河橋十一月立節將軍周權詐被檄自稱平西將軍復皇后羊氏洛陽令何喬攻權殺之復廢皇后十二月呂朗等東屯滎陽成都王穎進據洛陽張方劉弘等並按兵不能禦范陽王虓濟自官渡拔滎陽斬石超襲許昌破劉喬於蕭喬奔南陽右將軍陳敏率兵反自號楚公矯稱被中詔從沔漢奉迎太子逐揚州刺史劉機丹楊太守王曠遣弟恢南略江州刺史應邈奔弋陽

光熙元年春正月戊子朔日有蝕之帝在長安河間王顥聞劉喬破大

懼遂殺張方請和於東海王越越不聽宋胄等破穎將樓表進逼洛陽
穎奔長安甲子越遣其將祁弘宋胄司馬纂等迎帝三月東萊愷令劉
柏根反自稱愷公龍表臨淄高密王簡奔聊城王浚遣將討柏根斬之夏
四月己巳東海王越屯于溫顯遣弘農太守彭隨北地太守刁默距祁
弘等於湖五月枉矢西南流范陽國地燃可以爨至辰祁弘等與刁默
戰默大敗顯穎走南山奔于宛弘等所部鮮卑大掠長安殺二萬餘人
是日日光四散赤如血甲午又如之己亥弘等奉帝還洛陽帝乘牛車
行宮藉草公卿跋涉戊申驃騎范陽王虓殺司隸校尉邢喬己酉盜取
太廟金匱及策文各四六月景辰朔至自長安升舊殿哀感流涕謁于
太廟復皇后羊氏辛未大赦改元秋七月乙酉朔日有蝕之太廟吏賈
苞盜太廟靈衣及劔伏誅八月以太傅東海王越錄尚書驃騎將軍范
陽王虓爲司空九月頓丘太守馮嵩執成都王穎送之于鄴進東嬴公
騰爵爲東燕王平昌公模爲南陽王冬十月司空范陽王虓薨虓長史
劉輿害成都王穎十一月庚午帝崩于顯陽殿時年四十八葬太陽陵

帝之爲太子也朝廷咸知不堪政事武帝亦疑焉嘗召東宮官屬蜀使以尚書事令太子決之帝不能對賈妃遣左右代對多引古義給使張泓曰太子不學陛下所知今宜以事斷不可引書妃從之泓乃具草令帝書之武帝覽而大悅太子遂安及居大位政出群下綱紀大壞貨賂公行勢位之家以貴陵物忠賢路絕讒邪得志更相薦舉天下謂之互市焉高平王沉作釋時論南陽魯褒作錢神論廬江杜嵩作任子春秋皆疾時之作也帝又常在華林園聞蝦蟆聲謂左右曰此鳴者爲官乎私乎或對曰在官地爲官在私地爲私及天下荒亂百姓餓死帝曰何不食肉糜其蒙蔽皆此類也後因食餅中毒而崩或云司馬越之鳩史臣曰不才之子則天稱大權非帝出政邇宵人褒姒共叔帶並興襄后與犬戎俱運昔者丹朱不肖赧王逃責相彼凶德事關休咎方乎土梗以墜其情潯暑之氣將闌淫毒之音罕記乃彰嗤笑用符顛隕豈通才俊彥猶形於前代增淫助虐獨擅於當今者歟物號忠良於茲拔本入稱妖孽自此疏源長樂不祥承華非命生靈版蕩社稷丘墟古者敗

國亡身分鑣共軫不有亂常則多庸暗豈明神喪其精魄武皇不知其子也

贊曰惠皇居尊臨朝聽言厥體斯昧其情則昏高臺望子長夜奚寃金墉毀冕蕩陰釋胄及爾皆亡滔天來邁

晉書帝紀卷第四